

EKSODA YA VUNHARHU



Swilo hinkwaswo swa koteka, pfumela ntsena.

A hi korhamiseni tinhloko ta hina sweswi eka rito ra xikhongelo. Loko tinhloko ta hina ta ha korhamisiwile, ndza tivutisa loko ku ngava kuri na swikombelo swo hlawuleka leswi swi nga lavaka kuva swi tiveka emahlweni ka Xikwembu. Ntsena yimisa voko ra wena nakona, ntsena ehansi ka voko ra wena, ntsena khomelela xikombelo xa wena.

² Tatana wa le Matilweni, ha khensa hikokwalaho ka lowu, nkarhi wun'wana wa kuva hi hlengeletanile kun'we, tlhelo leri ra hilaha ku nga Heriki. Nakona hi languterile emixwени lowu kuva ku pfuxetiwa ka matimba ku ta huma eka Wena, ku hi nyika xitiya-nhlana eka rendzo leri tshameke emahlweni. Hi hlengeletanile tani hilaha vana va Vaheveru va nga endla hakona emixwени wa mahlamba-ndlopfu, ku kuma mana lawa ya nga phameriwa vona ni vusiku, ku va hlaysia eka siku leri ri taka. Hi hlengeletelana Mana ya ximoya, mixo lowu, ku hi nyika ntamu eka rendzo.

³ Ehansi ka rin'wana na rin'wana ra mavoko lawaya ya nga ya ehanhla, U tiva hinkwaswo leswi va nga ni swilaveko swa swona, Hosi. Kutani ndzi khongela xikhongelo xa mina, na xa vona, emahlweni ka Wena, leswaku Wena u ta phakela xilaveko xin'wana na xin'wana lexi va nga na xona. Horisa vavabyi na lava va xanisekaka, Hosi. Ha swi tiva leswaku Wena u Xikwembu, nakona u nga endla swilo hinkwaswo, nakona u tshembhisile ku swi endla loko ntsena hi nga endla hilaha risimu ri nga hi kombela hakona, *Pfumela Ntsena*, na hilaha hi nga twa marito yo kwetsima, *Famba Na Ku Vulavula Na Hosi*.

⁴ Sweswi, Tatana, Xikwembu, katekisa Rito ra Wena loko Ra haya emahlweni mixo lowu, nakona ingaku Ri nga kuma vuwiselo bya Rona etimbilwini ta hina, leswaku Ri ta humelerisa swilo leswi hi swi kombelaka, Tatana. Hi Vito ra Hosi Yesu ha swi kombela. Amen.

Mi nga tshama ehansi. Ndza ku khensa, sesi.

⁵ Ndzi pfumela leswaku swi vuriwile, "A ndzi tsakile loko va ndzi byerile leswaku, 'A hi yeni endlwini ya Hosi.'"

⁶ Ku suka eHot Springs, tolo, Makwerhu Moore a ri karhi a ku, "Makwerhu Branham," a ku, "wena, xana u ngaka u nga chayeli ku rhelela, eTexas, nakona u ri na mina eka khonivhexini ehansi lahayha," a ku, "u wisa masiku ma ngari ma ngani?"

⁷ Ndzi ku, "Ndzi na swikhongelo swimbirhi mundzuku."

A ku, "Swikhongelo swimbirhi?"

Ndzi ku, "Ina."

⁸ A ku, "Hilaha u chumayelaka hi matimba hakona lahawani," a ku, "wanuna a fanele ku wisa vhiki endzhaku ka xin'wana na xin'wana xa swona." A ku, "U teka mufundhisi, a nyika hungu ra yena ra Sonto ni mixo, na swin'wana," a ku, "kutani u wisa vhiki hinkwaro. Nakona, manuku, nakona kumbexani sweswo swi ngava makume nharhu wa timinetse, kumbe swin'wana." Kutani a ku, "U chumayerile ku ringana tiwara timbirhi kumbe tinharhu lahawani, hi nkarhi," a ku, "kutani, siku endzhaku ka siku, nakona nkarhi wun'wana kambirhi hi siku, kutani u endla layini ya xikhongelo, hinkwako ku vonisisa kwaloko." A ku, "Sweswi u ri u ya ekaya, u va na swikhongelo swimbirhi hi Sonto?"

Ndzi ku, "Ina, nkulukumba."

A ku, "Xana u swi endlisa ku yini?"

Ndzi ku, "Kupfuna kanga ku huma eka Hosi." Ma vona?

⁹ Awara yi hundzeriwile, tani hilaha un'wana, munhu un'wana a nga swi vula ku ngari khale ngopfu, eka xikhongelo, loko ndzi ri karhi ndzi nghena. Awara yi hundzeriwile, nakona xilaveko i xikulukumba, nakona hi lahawani ku ta ringeta ku veka xiphemu xa hina, ku pfuna awara leyikulukumba leyi hi hanyakaka eka yona.

¹⁰ Sweswi, loko Hosi yi swi rhandza, vusiku lebyi, ndzi lava ku vulavula eka dyondzo, "Xana vutomi bya wena byi na ndzhuti eka Evhangeli?" Sweswo hi leswaku, ndzi lava ku swi kandziyisa sweswo.

¹¹ Kutani sweswi, a ndzi swi tivi loko kuri leswaku va ya eku kandziyiseni ka leswi mixo lowu, kumbe va nga swi endlili. Ndzi vona van'wana le kamareni. Ku na—ku na van'wana va vanakulorhi endzeni lahay; ndzi pfumela leswaku va kona. Ndzi endlile... A ndzi ehleketa leswaku Makwerhu Neville u ta swi endla leswi. Ndzi komberile, Sonto lowu nga hundza, ntsena kuva yena a va na ra yena... a ya emahlweni na hungu ra yena; kutani a ya emahlweni, ku ndzi pfumela ntsena ndzi wela endzeni na swin'wana endzhaku ka yena. Kambe, loko va lava ku kandziyisa dyondzo ya xikolo xa Sonto, hikokwalaho ka yini, swi tava swi ri kahle.

¹² Kutani, loko Hosi yi swi rhandza, Sonto lowu wu taka, sweswo hi leswaku, loko Hosi yi swi pfumelela nakona hi ri lahawani, ndzi lava ku vulavula hi dyondzo leyi a ndzi lava ku yi vulavula eka nkarhi wo leha, na kuva ndzi tshembhisile leswaku ndzi ta vulavula Hungu kukotisa sweswo ku suka etabernakeleni, ku sungula, Mahungu lawaya ya nga kandziyisiwa. Ndzi lava ku sola rixaka leri hi kuva ri vambile Yesu Kreste; mixo wa Sonto lowu landzelaka, loko Hosi yi swi rhandza.

¹³ Kutani sweswi, vusiku lebyi, hi awara ya nkombo, kumbe hafu ku bile awara ya nkombo, i e—i e Hungu ra ku “Xana vutomi bya wena byi na ndzhuti?”

¹⁴ Sweswi, minkarhi yin’wana, eka ku vulavula hi Mahungu yo kotisa yalawa, ndzi vula swilo leswi swi tsemaka hi matimba. Nakona kahle-kahle a ndzi swi vuli eka kereke leyi lahawani, kumbe swin’wana. Tsundzukani, loko ndzi ri karhi ndzi vulavula, sweswo swi famba ku rhendzeleka na misava. Ma vona? Nakona hi na thepi leyi nga simekiwa, ku rhendzeleka na misava, nakona va tlherisela Mahungu lawa endzhaku emakhwatini na hinkwako-nkwako. Nakona Moya lowo Kwetsima minkarhi yin’wana wa ndzi rhangela ku vula swin’wana leswi swi nga vaka swi ri wona nchumu lowu Wu wu lavelaka munhu un’wana le hansi e Australia, kun’wana, kumbe swin’wana. Swingaleswi, kumbexani, swiyimo swin’wana, mi nga ku, “Kunene, sweswi, xiyimo xexo a xi hanyi lahawani. Xana u swi vulela yini sweswo?” Kumbexani i xa kun’wanyana, ma swi vona. Swingaleswi, ina, ndzi na ntiyiso leswaku n’wina vanhu ma swi twisisa sweswo, leswaku Mahungu lawa a ya kongomisiwanga eka mani na mani. Ntsena ya kongomisiwile eka Kereke, hi ku angarhela, hinkwako-nkwako, na swihi na swihi leswi Hosi yi nga ta hi rhangela ku swi vula na ku swi endla.

¹⁵ Ndzi vile na nkarhi wo kwetsima ehansi le Hot Springs, na le ka nhlengeletano ya fexini ya xikhale ya Xipentekosta. Ndzi ni ntiyiso leswaku vo tala va n’wina mi enetisekile leswaku lavaya i vanhu va Xipentekosta ehansi lahaya, hi mpfhuka kuri n’wina—n’wina mi nga rhelela kwalahaya. Kunene, ntsena, a ndzi wu tivi ntlawa. Ntsena a ndzi kunguhatile ku rhelela kona ku ringana vhiki, nakona ndzi nyika masiku mambirhi kumbe manharhu. Kambe ndzi lava ku vula nchumu wun’we. Eka nhlengeletano liya, hakunene a vari na ripfumelo, ro pfumela. Loko un’wana wa n’wina a ri kwalahaya . . .

¹⁶ Leswi, ndza swi tiva, wansati loyi lahawani, a tshameke ekhoneni, a ndzi swi tiva leswaku hi yena mani. Kumbe, kona kwala, ndza swi tiva leswaku a ri kwalahaya. Nakona ndza swi tiva leswaku vamakwerhu va ngari vangani a va ri kwalahaya, Makwerhu Jackson, vona, Makwerhu Palmer.

¹⁷ Sweswo hi leswi vanhu va swi kumaka loko va ri na ripfumelo. Ma vona? Ma yi xiyisisa layini liya ya ku horisa? A ku ngari na un’wana loyi a nga nghena kumbe ku huma ehandle ka lava Xikwembu xi nga va horisa. Ma vona? Ma vona? Swingaleswi, loko mi ri na ripfumelo . . .

¹⁸ Kutani nchumu wun’wana, ku ngava kuri na van’wana va n’wina, mi ngava mi nga wu twisisi ntlhaveko luwa, ku cina, ku huwelela. Kunene, ntsena va . . . A va langutelanga eka munhu

un'wana wo karhi. Ntsena vo va eku huweleleni, emahlweni ka Xikwembu. Ma vona? Sweswo hinkwaswo swi lulamile.

¹⁹ Kambe, ndzi lava ku vula leswaku, hi wun'wana wa—wun'wana wa ntlawwa wa vavasati vo languteka va basile lava ndzi nga tshama ndzi va vona, misisi liya yo leha, na—na vanhu ku suka endzhaku le makhwatini, endzhaku le swihlahleni. Kambe a ndzi pfumeli leswaku ndzi vonile mani na mani kwalahaya loyi a nga muxaka wa ku languteka ximanguva lawa, ma swi tiva leswi ndzi swi vulaka, na hinkwato tinxaka ta timake-up na swilo leswi toriweke. Swa kombisa. Ndzi ngava ndzi nga pfumelelani na vona eka hinkwaswo leswi va swi dyondzisaka, kambe ndzi pfumela hakunene kwalahaya. Lavaya a va languteka tani hi Vakreste, eka mina.

²⁰ Swingaleswi Hosi yi ndzi rhangerile kuva ndzi vulavula hi dyondzo, tolo, kumbe tolweni, ni nhlekanhi: *Kan've Ntsena, Hosi*. Nakona ekerekeni, van'wana va vona lahay a va nga swi tivi, ndzi endlile sweswo hi xikongomelo, hikuva Hosi yi ndzi rhangerile ku endla sweswo. Xintlawani lexiya a xi ri karhi xi khulukela eka swin'wana, nakona Hosi yi pfunetile eka sweswo ku—ku swi endla. Swingaleswi, a swo va kahle. Hakunene ndzi . . .

²¹ Ma swi tiva, swilo swi ya emahlweni, loko u ngari na tihlo ra ximoya, a wu swi kumi. Ma vona? U fanele ku langutela emahlweni ka swilo sweswo.

²² Ndzi nghenile. Nakona Makwerhu Ungreni loyi, sweswo i ra vumbirhi laha ndzi nga tshama ndzi twa wanuna loyi a yimbelela. Ntsena loko ndzi nghena ekamareni, a ri karhi yimbelela *Ndza Famba Na Ku Vulavula Na Hosi*. Ndzi ehleketele, “Xana sweswo a swi sasekanga!” Hilaha yona Hosi yi nga tshama . . . Ma vona? Ku famba na ku vulavula, sweswo swi vula xinakulobye xa nkarhi na nkarhi. Ku ngari ntsena ekerekeni, kambe, hinkwako-nkwako, ku famba na ku vulavula na Hosi.

²³ Nakona kwalahaya, ndzi langutisile ehenhla ka khumbi, nakona a kuri na khadi leri tlhomowiweke eka xifaniso lexintsongo kwalahaya, xa muxaka wa mbono lowu wanuna loyi a nga thyiwa George Todd a nga—a nga ndzi pendela. A ndzi swi tivi leswaku hikokwalaho ka yini wanuna luya a kale a swi endla. Nkarhi wun'wana, kumbexani, ntsena a nga ehleketa, nakona a xi pendile nakona i xifaniso xa ntshava, endzhaku le hlathini, na—na xinambyana xi ri karhi ri khulukela ehansi. Kutani eka tlheloi lerin'wana ra xinambyana, ku yimile ndhakazi ya ntswele na xindhakazani, na tindleve ta tona ti yimerile ehenhla, ti langutile ku tsemakanya xinambyana. A ndzi swi tivi loko kuri leswaku Nkul. Todd u kona. A ndzi n'wi tivi. Kambe, ndzi lava ku vula leswi, Hosi yi vulavurile na mina loko ndzi langutisile xifaniso lexiya. Nakona kumbexani a nga swi tivi, loko a ri karhi a xi penda.

²⁴ Ma xi tsundzuka xitori nyana xa mina hi mayelana na ndhakazi leyi nakulorhi a ya eku yi baleseleni, na ku vitana ka yena? Kunene, yi kwalahaya na xindhakazani xa yona, swingaleswi, emamatini ya vutomi. Ma vona? Huhutelo, hilaha ndhakazi leyikulu na n'wana wa yona a swi ri kwalahaya! Kutani ndzi ehleketeile, “Ina. Nakona eka tlhelo lerin’wana, laha ku nga na, eminsinyeni leyi tshamaka yi ri rihlaza, ndzi na e—e manana na n'wana kwalahaya, na swona, lava va rindzeleke layaha.”

²⁵ Ndza ku khensa, makwerhu, Makwerhu George Todd, loko kuri leswaku wanuna u kona mixo lowu.

²⁶ Sweswi, ndzi ngava na dyondzo ya xikolo xa Sonto. Hi ntoloveloo ndzi muxaka wo lehisa eka yona.

²⁷ Kuna nchumu wun’wana lowu wu tshamaka wu ri karhi wu famba embilwini ya mina, a ndzi swi tivi, hi mpfhuka ka tolo. Sweswi hi . . . loko Hosi . . . i e—i e dyondzo. Ndzi le ku dyuhaleni, nakona a ndzi—ndzi swi tivi leswaku i ku leha ku fika kwihi ndzi nga tava lahawani. Kambe kuna xivutiso lexi kulukumba ekerekeni, lexi xi endlaka vavanuna va kanetana, na mavonele yo hambana.

²⁸ Ntsena tani hi ku dya “apula.” Nakona ndzi chumayerile hi Hungu, nakona ndza pfumela, hi matimba, ndzi nga swi khorwisa hi Matsalwa, leswaku a ku ngari maapula. Ma vona? Swi vangile mpfilumpfilu wo tala.

²⁹ Swingaleswi, kumbexani, loko hi nga se famba . . . Hi fanele ku tlhelela endzhaku sweswi, hi kwalomu ka makume nharhu wa masiku, ma swi tiva, ku tlhelela e Arizona. Swingaleswi loko kuri leswaku, loko ndzi nga se famba, loko Hosi yi swi rhanda, ndzi nga tsakela ku teka Tsalwa. Nakona mi nga ri kandziyisi. Loko va swi endla, mi nga yi xavisi thepi. Mi nga yi tshiki yi huma. Ndzi lava ku hlamusela Ntiyiso wa xiviri hi vukati na ku thalana. I xivutiso. Nakona leti i tiawara to hetelela, leswaku, “Loko swihundla hinkwaswo swa Xikwembu swi ta hetisiwa.” Kutani tolo, ku ta ku tsemakanya tintshava, ni nhlekanhi, Moya lowo Kwetsima a wu tikomba wu ndzi byela leswaku, “Kandziyisa sweswo kutani u swi veka ekule,” a ndzi swi tivi leswaku hikokwalaho ka yini, kambe, “Ntiyiso wa xiviri wa vukati na ku thalana.”

³⁰ Van’wana va vona va ri, “Vanhua va nga tekana, loko va nga hlambanya leswaku a vari eka vuoswi.” Nakona van’wana va ri, “Kunene, loko va nga khomani kahle, nakona—nakona va nga koti ku hanya swin’we; swa antswa ku sukela, misava, hi ku rhula, ku tlula ku hanya etiheleni emisaveni.” Na hinkwaswo swivutiso leswiya swo hambana-hambana! Nakona van’wana va va tekanisa ntsena hi ndlela yihi na yihi ya xikhale. Nakona van’wana va lava ku haxa mati yo kwetsima eka vona, na ku va tlherisela endzhaku, va ku, “A va se tshama va tekana.” Kutani

va va katekisa, na ku va tlherisela ekerekeni nakambe. Kuna tinxaka hinkwato ta mpfilumpfilu. Kambe, loko kuri leswaku kuna mpfilumpfilu swonghasi, kuna Ntiyiso kun'wana.

³¹ Ndza pfumela, na ku vula leswi hi xichavo, ndzi pfumela leswaku Hosi yi ndzi paluxerile swona, nakona ndzi... e Ntiyiso. Nakona loko wo nghena exikarhi ka tikereke, wu nga handzulela nchumu wolowo kuva swiphemuphemu. Leswi, kumbexani a wu fanele kuva tano. Kambe wu... Swi nga ha antswa ndzi pfumelela vafundhisi, ntsena ku pfumelela vafundhisi va tikereke, va kuma thepi. Na ku va pfumelela va yi tlanga, kutani va nga rhangela ku suka kwalano kuya emahlweni. Kambe ndzi nga tsakela ntsena ku kandziyisa sweswo, ku kombisa Ntiyiso wa xiviri wa swona. Ndzi pfumela leswaku leyi i awara laha leswi "swihundla swi nga ta hetisiwa," swi hetiseriwile. Swi biwile, tani hilaha hi nga vula, ehansi ku rhelela hi tinguva, ta tithepi, tani hilaha hi nga tisa *Swilemo* leswiya *Swa Nkombo*, na *Tinguva Ta Nkombo Ta Kereke*.

³² Nakona sweswi hi langutanile na nkarhi wa *Tinanga Ta Nkombo*, na swona *Swimbitana*. Nakona kumbexani hi nga veka nhlengeletano ya mavhiki mambirhi na ku swi veka ha vumbirhi kun'we. Ndzi nga tsakela ku endla leswaku swi kandziyisiwa.

³³ Kutani, ehandle ka sweswo, ndzi le ku ringeten i sweswi ka ku endla leswaku swi hleriwa, na ku endla tibuku ku suka eka swona, ta *Tinguva Ta Kereke*; tibuku ta nkombo ta nguva ya kereke, tithepi ta nkombo, na ku ti endla hi ndlela ya leyo. Hi nga endla kuva swi endliliwa ntsena hi ku chipa hilaha hi nga kotaka hakona, leswaku munhu un'wana na un'wana a ta swi kuma. Kutani, loko Hosi yi hlwela, ivi ndzi hundzela emahlweni, mi ta swi vona leswaku swilo leswi ndzi nga swi vula hi Vito ra Hosi swi ta humeleta ntsena tani hilaha Swi nga vuriwa hakona. A swi se tshama swi tsandzeka, hambiswiritano, nakona swin'wana swa Swona swi fanele ku humeleta endzhaku.

³⁴ Nakona ndzi—ndzi tshembha leswaku Hosi yi ta hi pfumelela ku endla sweswo xikan'we-kar'we. Hi ta tivisa vanhu, nkarhi, hikuva kuna votala lava va tsakelaka ku ta va ta twa swilo sweswo. Nakona ndza—nakona ndza swi khensa sweswo.

³⁵ Loko ku ngari na loyi a nga Swi pfumela, kumbe ku Swi yingisela, xana hi swihi swa kahle leswi swi nga ta ndzi endla swona, ku yima lahawani, ndzi nga vuli nchumu hi mayelana na Swona? Ma vona? Swi tava tani hi ku cukumetela xinkwa ehenhla ka mamati. Swi ngava tani hi... Loko kuri leswaku a ku nga tava na loyi a ta swi pfumela, kutani a swi tava tani hi ku cukumetela maribye yo hlawuleka emahlweni ka tinguluve. Kambe kuna magidi ku andzisa hi magidi lava va pfumelaka Sweswo. Ma vona? Nakona va khomeleta eka Rito rin'wana na rin'wana. Nakona hi nga tsakela ku nghenisa votala swonghasi endzeni, hilaha swi kotekaza hakona, loko hi—loko

hi tilulamisela kuva na swikhongelo leswi, na le ka ku dzuneka ka Hosi. Nakona hi tshembha leswaku Xikwembu xi ta hi nyika swona.

³⁶ Nakona a ndzi lavi kuva na sweswo ku kondza ndzi va ndzi huhuteriwhile hi Vukwembu kuva ku swi endla. Xikwembu xi na nkarhi wa xin'wana na xin'wana. Ma vona? A mi fanelanga ku famba emahlweni ka wona. Loko mi tsema koroni ya n'wina loko ku nga se . . . Va vekela xitshoveri kwalahaya loko yi nga se vupfa, mi lahlekeriwa hi xiave xi kulukumba xa koroni ya n'wina. Ma vona? Swingaleswi, loko sikiri yi lulamerile kuva yi tlhomiya endzeni, Xikwembu xi ta yi tlhomiya endzeni, kutani hi taya eku tshoveleni. Kambe ntsena ndzi . . .

³⁷ Loko, ndzi twa ndzi tshikeleleka ku kotisa sweswo. A ndzi ehleketa leswaku ndzi ta tidzudza ndzi huma eka swona, hi xinkadyana. Siku hinkwaro tolo, a ndzi nga swi koti ku swi susa emiehlekeweni ya mina, vusiku hinkwabyo vusiku lebyi nga hundza. Ndzi yile emubedwени hi kwalomuya ka awara ya khume mbirhi. Ndzi vile na ku ringana tiawara tinhарhu to etlela, hi xa vusiku bya tolo. Kutani vusiku lebyi nga hundza a ndzi kotanga ku etlela. Hambiswiritano, Xin'wana xi te, "Kandziyisa sweswo, *Vukati Na Ku Thalana*." Ma vona? Swingaleswi ndzi—ndzi . . . Loko Hosi yi swi rhandza, loko sweswo swi tshama embilwini ya mina nakona Hosi yi ndzi kombisa swin'wana swotala mayelana na swona, kunene, manuku, ndzi ta . . . Ndzi—ndzi nga ha swi kandziyisa sweswo. Ma vona?

³⁸ Kambe, tsundzukani, i swa vachumayeri ntsena. N'wina ma ta, kambe, nakona mi yingisela. Kambe thepi yona hi yoxe, pfumelelani . . . Ma vona, hikuva yi nghena exikarhi ka tinhlengeletano, nakona tin'wana ti hi ndlela *leyi*, nakona tin'wana hi ndlela *yaleyo*, nakona ti koka mavonele ya tona vinyi. Nakona ndzi lava vamakwerhu va tiministara kuva na ku hlaya ka vona vinyi, kutani hi va pfumelela va famba ku suka lahaya, hikuva hi vona lava va nga na vutihlamuleri. Hi vona valava. Tani hi ku rhelela na ku yi tlangela muavanyisi, tin'wana ta tinghamula leti. Ina.

³⁹ Vonani leswi Hosi yi nga swi vula hi mayelana na leswi, *Vukati Na Ku Thalana*. Hi leswi kwetsimeke swinene ku tlula leswi vanhu va ehleketa leswaku swi xiswona. Nakona swi ta fambelana kahle na *Mbewu Ya Nyoka*. Ntsena nchumu lowu fanaka, ntsena wu ri karhi wu famba kuya emahlweni, sweswo hi swona swihundla. Tsundzukani, "Hi masiku ya ntsumi ya vunkombo, hinkwaswo swihundla swa Xikwembu swi fanele ku hetisiwa," swilo leswiya swi nga tivekiki leswi Hosi yi nga ta swi fikisa emakumu. Sweswi, ku fikela sweswi . . .

⁴⁰ Sweswi tsundzukani, hafu ku bile awara ya nkombo hi loko mi sungula nhlengeletano ya n'wina. [Makwerhu Neville a ku,

“Ina.”—Muhleri.] Sweswi, Makwerhu Neville, loko u ri na hungu ra vusiku lebyi, ri chumayeli. Ma vona? [“Ee, nkulukumba.”] A swi nge ndzi tekeli ku ringana awara kumbe makume mune-ntlhanu wa timinetse, nakona ndzi ta kandziyisa leswin’wana swa swona.

⁴¹ Ndza swi tsakela ku yingisela Makwerhu Neville. Ndza n’wi rhandza. Hi yena makwerhu wa mina. Nakona ndzi—ndzi ehleketa leswaku hi yena xivulavuri xo hlamarisa, muchumayeri wa kahle. Nakona ndzi... Nchumu wun’we hi Makwerhu Neville, lowu ndzi wu tsakelaka, loko a vula swin’wana na swin’wana, u hanya leswi a vulavulaka hi mayelana na swona. Sweswi, walowo i—walowo i nchumu lowukulu.

⁴² Ma swi tiva, mi nga ha hanyela nakulorhi nchumayelo ku antswa ku tlula ku n’wi chumayilela wun’we. “Hikuva n’wina vinyi mi mapapila lawa ya tsariweke, lawa ya hlayiwaka hi vanhu hinkwavo.” Sweswi, a hi, loko hi nga se...

⁴³ Hi nga ha pfula mapapila endzhaku, kambe Xikwembu xi fanele ku pfula dyondzo leyi ya xikolo xa Sonto, swingaleswi ntsena a hi kombeleni kuva Xi endla sweswo.

⁴⁴ Tatana wa le Matilweni, hina—hina hi ripfumelo ho langutisa ku kongoma nkarhi lowu taka. Ndzi langutisile sweswi, hi ripfumelo, ku kongomana na nchumu wun’wana lowu taka, Hosi, ehenhla ka misava, lowu wu nga ta kokela vanhu va Wena kun’we. Loko hi vona tikereke ta xidinominexini ti tlimbeletela ehansi na kuva na mihoni swonghasi, hakunene swi le ku susumeteleni ka vanhu ehandle; ntsena tani hilaha a swi ri xiswona e Egipta, faro a ri karhi a pfuka, loyi a nga n’wi tivi Yosefa.

⁴⁵ Tani hilaha a swi ri xiswona ejarimani, na—na le henhla eRussia, na Italy, vanhu va pfuxile va Yosefa, Hitler na Stalin, Mussolini, lava a va venga Mayuda. A va boheka ku tlhelela etiko-xikaya ra vona. Xikwembu, U na tindlela to endla swilo, leti hina hi nga ti twisisiki. Nakona U va tshikelerile. Ku ngari na kaya ejarimani; swilo hinkwaswo swi tekiwile eka vona. Na swona, e Italy, Russia, ku ri hava ndhawu yo ya kona. Nakona va tlhelerisiwe etiko-xikaya ra vona, ntsena ku hetisekisa Rito.

⁴⁶ Oho, voko leri ri rhandzaka ra Xikwembu! Hilaha, minkarhi yin’wana, ri languteka ri ri na tihanyi, hi ndlela leyi vanhu va xanisekaka hakona, kambe rona, hambiswiritano, hi rona voko ro olova ra Yehovha, leri rhangelaka swihlangi swa Yena. Ha Ku khensa, Hosi.

⁴⁷ Sweswi ndza khongela, Xikwembu, tani hi leswi ndzi vonaka siku leri dinominexini yi nga eku tshikeleleni ka vapfumeri, yi ri karhi yi va hlongola, yi vula, leswaku, “Mavito ya vona ya boheka ku vekiwa ehenhla ka buku, kumbe va lahlekile. Va ngavi na nchumu xo xi endla na ntawla lowu wun’wana.” Kova ntsena voko ro olova ra Yehovha, leri ri va rhangelaka

kuya eNsinyeni wa Vutomi. Ndza khongela, Xikwembu, leswaku, un'wana na un'wana. Ndza swi tiva leswaku va ta swi endla. Hikuva, i Rito ra Wena, nakona Ri ngaka ri nga tsandzeki. Nakona ingaku hi nga rhangeriwa kuya eNsinyeni wa Vutomi, leswaku hi tava vinyi va Vutomi lebyi nga Heriki, hi vona voko ra Xikwembu, nakona, hi matihlo ya ripfumelo, hi langutisa ku hundza mindzhuti leyi hi fambaka eka yona namuntlha, hi vona Tiko leri nga tshembhisiwa kwala mahlweni.

⁴⁸ Katekisa Rito ra Wena, mixo lowu, Hosi, Matsalwa nyana na tinotsi leti ndzi nga ti tsala ehansi lahawani. Ingaku Moya lowo Kwetsima wu nga ta sweswi, tani hi loko mina ndzi tinyikela, ku yimbisiwa ka ririm na mianakanyo, miehleketo. Nakona kereke yi nyikela tindleve ta vona ta ku twisisa, timbilu ta vona, na hinkwerhu ka hina, kun'we, leswaku U ta vulavula na hina hi Rito ra Wena, hikuva Rito ra Wena i Ntiyiso. Hi Vito ra Rito, Yesu Kreste, ha swi kombela. Amen.

⁴⁹ Sweswi, pfulani eTibibeleni ta n'wina, eka Buku ya Eksoda. Kutani sweswi ndzi lava ku hlaya xiphemu xa Tsalwa ku suka eka Eksoda, kavyisa ka vu3, ku suka eka 1 ku fika eka 12. Ntsena yingisani, hi vukheta, loko ha ha hlaya. Eksoda, ku avanyisa ka vu3, 1 ku fika eka 12.

Sweswi Muxe a rhangerile mintlhambi ya Yetro mukon'wana wa yena, muprista wa Midian: nakona a yisa ntlhambi etlhelo ra mananga, kutani a fika entshaveni ya Xikwembu, hambi kuri eHoreb.

Kutani ntsumi ya Hosi yi humelela eka yena emalangavini ya ndzilo exikarhi ka xihlahla: kutani e... u... nakona u langutisile, kutani, vonani, xihlahla a xi pfurha hi ndzilo, kambe xihlahla a xi nga heli.

Kutani Muxe a ku, sweswi ndzi ta hambukela etlhelo, ndzi ya vona masingita lamakulu lawa, laha xihlahla xi nga... ha yini xihlahla xi nga heli hi ku tshwa.

Kute loko Hosi Yi vonile leswaku u hambukerile etlhelo ku ta vona,...

⁵⁰ Ndzi lava ku tshikelela eka sweswo!

Kute loko Hosi yi vona leswaku u hambukile ku ta langutisa, Xikwembu xi vitana eka yena xi ri exikarhi ka xihlahla, kutani xi ku, Muxe, Muxe. Yena a ku, Hi mina loyi.

Kutani xi ku, Una tshuki u tshinela laha: kambe susa tintangu emilengeni ya wena, hikuva xivandla lexi u yimeke ka xona i misava leyo kwetsima.

Xi engeta xi ku, Hi mina Xikwembu xa tata wa wena, Xikwembu xa Abraham, Xikwembu xa Isak, ni Xikwembu xa Yakopo. Kava loko Muxe a

tumbeta mombo wa yena; hikuva a chava ku langutisa Xikwembu.

Kutani Hosí yi ku, Hakunene ndzi vonile ku xaniseka ka vanhu va mina lava nga eEgipta, . . . Ndzi yingisile xirilo xa vona hi xivangelo xa lava va va xanisaka; hikuva Ndzi tiva nhlomulo wa vona;

Kutani Ndzi xikerile ehansi ku ta va ntshuxa ku suka emavokweni ya Vaegipta, ni ku va humesa etikweni lero ku va yisa etikweni ra kahle . . . e tiko lerikulu, na tiko leri khulukaka ntswamba ni vulombe; endhawini ya Vakanana, . . . Vahet, . . . Vahevi, . . . Vayebus.

Hikokwalaho sweswi, vonani, xirilo xa vana va Israel xi fikile eka mina: nakona Ndzi ku vonile ku tshikeleriwa loku Vaegipta va nga va tshikelela hakona.

Swingaleswi tana sweswi, kutani Ndzi ta ku rhuma eka Faro, . . .

⁵¹ Ma swi xiyisisa? “Ndzi xikerile ehansi.” Kambe, “Ndza ku rhuma.” Xikwembu, xi ri karhi xi famba hi xivumbeko xa wanuna. “Famba.” Mi nge ndzi hlaya ndzimana ya vu10 nakambe.

Swingaleswi tana sweswi, kutani Ndzi ta ku rhuma eka Faro, leswaku u ta humesa vanhu va mina vana va Israel ehandle ka Egipta.

Kutani Muxé a ku ka Xikwembu, Ndzi mani mina, leswaku ndzi fanele ku ya eka Faro, na leswaku ndzi fanele ku humesa vana va Israel ehandle ka Egipta?

Kutani xi ku, Kunene Ndzi tava na wena; nakona lowu wu tava mfungho eka wena, leswaku Ndzi ku rhumile: Loko u humelela . . .

⁵² Ndzi kombela mi ndzi khomela.

. . . Kutani loko u tava u humesile vanhu ehandle ka Egipta, mi ta tirhela Xikuwembu ehenhla ka ntshava leyi.

⁵³ A ndzi ngari eku swi xiyisiseni, eku sunguleni, kambe a ndzi titwile ndzi huhuteriwile hi vuenti hi Moya emixwени lowu, ndzi kumile sweswo hi nkarhi wolowo. Xikwembu, xi ri karhi xi rhumela nandza wa Xona endzhaku laha a nga baleka kona, Xi n’wi nyikile xikombiso xa ntshava. A ndzi kalanga ndzi swi xiyisisa ku fikela nkarhi wolowo. “Lowu wu tava mfungho hilaha ku nga Heriki eka wena.” Ma vona?

⁵⁴ Sweswi hi ya eku vulavuleni, emixwени lowu, hi dyondzo ya eksoda ya vumbirhi ya vanhu va Xikwembu, kumbe ku vitaneriwa ehandle ka vanhu va Xikwembu. *Eksoda* swi vula “ku humeseriwa ehandle; ku vitaneriwa ehandle; ku tekeriwa ekule na.” Nakona ndzi lava ku tirhisa sweswo tani hi dyondzo, ya eksoda ya vumbirhi ya vanhu va Xikwembu. [Makwerhu

Branham u yi nyika nhloko mhaka ya, *Eksoda Ya Vunharhu*, eka xikhongelo xa ni madyambu—Muhleri.]

⁵⁵ Sweswi, va vile na tieksoda to tala, hakunene, kambe ndzi vulavula hi nkarhi lowu Xikwembu xi nga vitana eksoda, ku hambanisiwa na laha a vari kona, hi nkarhi wa kona. Lahawani, Xikwembu xi lulamisela ku hetisekisa Rito leri ri tshembhisiweke hi Vukwembu bya Xona leri xi nga ri nyiketa eka Abraham, na le ka Isak, na le ka Yakopo. Malembe, madzana ya malembe ya hundzile, kambe, hambiswiritano, Xikwembu a xi pfuki xi rivarile xitshembhiso xa Xona. Hi nguva ya kona, hi nkarhi wa kona, Xikwembu minkarhi hinkwayo xi endla leswaku xitshembhiso xa Xona xi lulama.

⁵⁶ Hikokwalaho, mi nga wisa mi ri na ntiyiso leswaku leswi Xikwembu xi nga swi tshembhisa eka Bibele leyi, Xi ya eku swi endleni. Ntsena a kuna xilaveko xa ku ringeta ku ehleketa swin'wanyana, na ku vula leswaku, "Kunene, muprofeta a ri, kumbexani, a hoxisa," kumbe, "sweswo a swi nga ta humeleta eka siku leri." A swi languteka swi nga koteki hi nkarhi luwa, ku ka swi nga koteki ngopfu ku tlula leswi swi swi endlaka sweswi. Kambe Xikwembu xi swi endlile, hambiswiritano, hikuva Xi tshembhisile leswaku Xi ta swi endla.

⁵⁷ Nakona langutisani hilaha Xi swi endlaka hi ku olova hakona. "Ndzi xikerile ehansi. Ndzi twile xirilo. Ndzi tsundzuka xitshembhiso xa Mina. Kutani Ndzi xikerile ehansi ku ta xi endla, nakona Ndza ku rhuma. U swi endla. Ndzi tava na wena. Hakunene, Ndzi tava na wena. Bya mina lebyi nga kaliki-, Vukona lebyi byi nga kaliki byi tsandzeka byi tava na wena kun'wana na kun'wana laha u yaka kona. U nga chavi." Ma vona? "Ndzi xikela ehansi ku ta ntshuxa." Ndzi ni ntiyiso leswaku miehleketo ya ximoya ya swi kuma sweswo. Ma vona? Ma vona? "Ndzi—Ndzi—Ndzi ya eku ku rhumeni, ku tisa vanhu va Mina eka eksoda. Va vitaneli ehandle, nakona Ndzi tava na wena."

⁵⁸ Sweswi, hilaha—hilaha hi nga wisaka hakona, hilaha ripfumelo ri nga kumaka ku khomelala hakona lahaya. Ma vona? Xikwembu xi ya eku swi endleni. Xi swi tshembhisile. Swi ngari na mhaka leswaku njhani, leswaku swiyimo hi swihi, kumbe leswi mani na mani a swi vulaka, Xikwembu xi ya eku swi endleni, hambi swi ri tano, hikuva Xi tshembhisile ku swi endla. Nakona Xi swi endla hi ku olova swonghasi, leswaku, swi—swi hundza ehenhla ka—ka matwisiselo ya miehleketo ya ndhavuko lava va ringetaka ku kanelia hi mayelana na swona, "Xana a swi ta kotekisa ku yini?"

⁵⁹ A ndzi vuli leswaku wanuna sweswi, na leyi ya kahle, miehleketo yo tiya, dyondzo ya kahle, leswaku wanuna yaloye a nge Swi twisisi. Sweswo swi lulamile, na kuva swi xongile, ntsena loko a nga tirhisi sweswo ku kanelia, kambe, ndhavuko walowo a nga na wona, ku pfumela Xikwembu. Wu pfumeleli

wu hundzukela eka ku olova ka ku yingisa leswi Xikwembu xi nga swi vula, na ku Swi pfumela. Ndhavuko wa yena wu ta n'wi pfuna manuku.

⁶⁰ Xiyisisani. Kambe loko wanuna yaloye a ringeta ku kanela, "A swi ngata endleka," kutani sweswo swi n'wi yisa ekule na Xikwembu, nkarhi na nkarhi, nkarhi hinkwawo, loko a ri karhi a ringeta ku—ku yingisela leswi, matwisisile ya yena n'winyi. Ma vona? Loko mi nga twisisi, nakona Bibele yi vula nchumu wo karhi, ntsena Ri hikahata hi, "Amen." Ntsena mi swi pfumelela swi fambisa xisweswo.

⁶¹ Sweswi, ematshan'wini yo kongomisa eka Matsalwa lawa, mi nga ha swi tsala ehansi, eka dyondzo leyi ya xikolo xa Sonto. Kambe a ndzi ta swi endla, kumbexani, loko mi nga tsakela ku swi langutisa. Kambe, xo sungula, ndzi na swo tala swonghasi lahawani. A hi . . .

⁶² Loko hi nga se kumisia leswi eksoda leyi yi vulaka swona, ndzi ya eku fananiseni ka tieksoda sweswi . . . eksoda hi nkarhi luwa, na eksoda ya sweswi, kutani hi vona loko ti nga fambisiwi hi ku vandzakana. Yin'we ya tona i ya ntumbuluko. Nakona swilo sweswiya Xi nga swi endla eka ntumbuluko, Xi le ku swi fananiseni nakambe, ku swi endla ndzhuti wa xifananiso eximoyeni, eksoda ya ximoya.

⁶³ Swa hlamarisa, ku vona Rito ra Xikwembu! Xana mani na mani a nga vurisa ku yini leswaku a Ri huhuteriwanga? Leswi a kuri kwalomu ka makume mbirhi-nhungu wa madzana ya malembe lawa ya nga hundza, ma swi tiva. Na hilaha Xi nga tshembhisa, na leswi Xi nga swi endla na ku swi andlala ehandle lahaya kuva xikombiso, hilaha Xi—Xi—Xi endlaka ndzhuti wa xilo xin'wana ku mbhonyiela hi swa—swa kahle. Ndzi nghena eka sweswo, vusiku lebyi, exikarhi ka n'weti na dyambu, loko Hosi yi swi rhandza.

⁶⁴ Kambe, xo rhanga, hi fanele ku langutisia Genesa ku vona leswaku hikokwalaho ka yini va vile ehansi le Egupta. Hikokwalaho ka yini vanhu va Xikwembu va vile ehandle ka tiko leriya? Endzhaku ka hinkwaswo, Xikwembu xi tshembhisile sweswo, kona kwalahaya masungulo a ya ri kona, hi Abraham, Isak na Yakopo, ePalestina, Xikwembu xi va nyikile tiko leriya, kutani xi ku, "Leri hi rona." Oho, kutani, hikokwalaho ka yini vanhu va ngavi eka ndhawu leyi Xikwembu xi nga va nyika yona?

⁶⁵ Xexo i xivutiso xa namuntlha, na kona. Xikwembu xi hi nyika pentekosta. Xi hi nyika Buku ya Mintirho. Xi hi nyika Moya lowo Kwetsima, ku hi rhangela na ku hi letela. Xi hi nyika Tiko. Nakona hikokwalaho ka yini hi ri ehandle ka Rona? Hikokwalaho ka yini kereke yi ri ehandle ka Rona? Hikokwalaho ka yini kereke leyikulu ya Xikreste namuntlha yi ngari eku

hanyeni kukotisa Buku ya Mintirho, ku humelerisa nchumu lowu fanaka? Kuna xivangelo xin'wana eka swona.

⁶⁶ Hinkwerhu ha swi tiva leswaku hi tshovekile, nakona hi le ka xiyimo xo chavisa. Nakona xiyimo xo chavisa ku tlurisa lexi—lexi Vukreste byi nga tshama byi hanya eka xona, i namuntlha. Nakona hi le ka...kona kwala makumu kumbe eriweni ra—ra loku kulu, ku avanyisa ko chavisa loku ku tshameleke kereke. Nakona loko ku avanyisa loku ku nga se humelela, Xikwembu xi le ku vitaneni ka eksoda, ntsena tani hilaha Xi nga swi endla nkarhi luwa. Swidyoho swa Vaamor a swi thopanile, swingaleswi Xi—Xi le ku vitaneni ka eksoda ya—ya ximoya. Sweswi a hi tlheleleni endzhaku xinkadyana, eka xifananiso, kutani hi ya kumisisa.

⁶⁷ Va rhelerile ehansi eEgipta, hinkwavo hikokwalaho ka mavondzo ya makwavo. Xexo hi xona xivangelo xa kuva Israel yi ri eEgipta hi nkarhi luwa, ehandle ka tiko. Tsundzukani, switshembhiso swa Xikwembu a swi ri kona ntsena loko va tshama etikweni leriya.

⁶⁸ Sweswi xana ma swi vona leswi a hi vulavula hi swona exikhongelweni, xinkadyana lexi nga hundza? Hikokwalaho ka yini Xikwembu xi bohekile ku nonohisa mbilu ya Faro? Ku tlherisela vanhu endzhaku etikweni leri nga tshembhisawa, loko Xi nga se va katekisa, ku humelerisa Mesiya eka vona.

⁶⁹ Xana a Xi fanele ku yi nonohisa njhani mbilu ya Hitler, kuva a lwisana na Muyuda, loko a ri Muyuda wa hafu, yena n'winyi? Xana a Xi ta faneli ku swi endlisa ku yini sweswo eka Stalin, Mussolini? Ma vona? Vanhu lava va nga huhuteriwangiki, kukotisa tiko, va—va... Xikwembu xi fanele ku teka e—e swilo leswi va hanyaka hi swona, milawu ya tiko, minkarhi yo tala, ku endla leswaku switshembhiso swa Xona swi va ntiyiso. Swingaleswi, a Xi fanele ku nonohisa timbilu ta valerisi lavaya, ku tsutsumisela Muyuda endzhaku etikweni leri nga tshembhisawa. A swi fanele kuva hi ndlela yaleyo.

⁷⁰ Sweswi ha swi kuma, leswaku, kuya ehansi, Yosefa... Ha xi tiva xitori, loko hi ri karhi hi tlhelela endzhaku eka Genesa, nakona ntsena mi nga swi hlaya. Hikuva, ntsena ndzi hlwerile nyana kuva ndzi sungula eka dyondzo ya xikolo xa Sonto leyo leha, nakona ndzi ta ringeta ku hatlisa.

⁷¹ Xiyisisani sweswi. Mi hlaya xitori loko mi swi kota, xa Yosefa, kuva a tswariwile endzhaku ka vamakwavo va yena, ekusuhi na lowo hetelela. Miehleketo ya ximoya yi ta swi kuma sweswo sweswi. A ngari n'wana wo hetelela; a kuri Binjamin. Kambe eku hlongoriweni, langutisani. Yosefa na Binjamin a vari vamakwavo va ngati hi ku hetiseka, nakona lava vambirhi ntsena a vari vamakwavo. Binjamin a nga kalanga a kuma ku lemukiwa ku kondza a hlangana na Yosefa. Nakona ehenhla ka lavan'wana va vona, Binjamin u nyikiwe xiphemu ha kambirhi

xa swilo hinkwaswo leswi Yosefa a swi nyikaka. Swi lulamile. Xiyisisani sweswi, hi kuma leswaku ehansi lahaya, a vari. . .

⁷² U tekiwile eka vamakwavo va yena hikokwalaho kova a ri wa ximoya. A ri wanuna lonkulu, hambi leswi a ri wo titsongahata eka ntlawa, lontsongo eka ntlawa. “Nakona a va n’wi venga ehandle ka xivangelo.” A va fanele ku ka va nga n’wi venganga. A va fanele kuva va n’wi hlöniphile. Hikuva, hikokwalaho ka yini va n’wi vengile, hikuva a ri makwavo? Ku ngari sweswo ngopfu. Va n’wi vengile hikokwalaho kova Xikwembu xi tirhanile na yena ku tlula hilaha Xi nga tirhana na lavan’wana va vona. Ma vona? Xi n’wi nyikile e—e—e matwisisele ya ximoya. A kota ku hlamusela milorho, hi ku hetiseka. Nakona a kota ku vhumbha swilo leswi a swi ta humelela, hi ku hetiseka, ntsena hi ndlela leyi a swi ri xiswona. Nakona a—nakona a nga kondli swibakele.

⁷³ U vonile e—e norho wa tinyandza letiya ti ri karhi ti korhama emahlweni ka tinyandza ta yena, nakona vamakwavo va yena manuku va sungurile ku n’wi hlundzukela. Va ku, “Ndza tshembha, manuku, wena muvumbuluki wo kwetsima lontsongo,” hi marito man’wana, “hi ta fanela ku korhama emahlweni ka wena siku rin’wana?” Kambe yaleyo i ndlela leyi swi nga humelerisa xiswona. Ma vona? Xana a swi ta endlekisa ku yini kuva swihontlovila leswiya swi kulukumba swi tshuka swi korhama emahlweni ka luya ntsanana, nakulorhi loyi a nga tivikaniki loyi a yimile kwalahaya? Kambe va swi endlile, hakunene va swi endlile, na ku kombela ntsetselelo. Kambe a nga se ta eka matimba, loko swaha te tano, ma swi vona. A ha ri ntsena eka xivumbeko xa vun’wana.

⁷⁴ Kutani hi kuma leswaku, hi ku endla leswi, leswaku Yosefa u tekiwile ku suka eka vamakwavo va yena, tidinominexini, kutani a kongoma ehandle eka yena n’wini. Ma vona? Vamakwavo va yena, hinkwavo etikweni. Kutani hiloko ku ta nchumu lowukulu swonghasi. Hi lemuka leswaku Israel. . . ntsena loko va ha tshama endhawini ya vona yo tshama ka yona, kutani a va hlayiseka. Sweswi, wolowo i nchumu wun’we wa kahle, ku tshama endhawini. Hi matshamele lamanene, sweswo hi swona. Kambe, va cukumetile Moya.

⁷⁵ Valandzeri va nawu, namuntlha, hi matshamele va tiva leswi va nga xiswona, hi matwisisele ya vutlharhi ya Bibele, kambe ku hava Moya. Va arile Yosefa, va N’wi tlheriserile ehandle. A va nga lavi nchumu wo wu endla na Wona. “I ntlawa wa vavumbuluki vo kwetsima. I. . . A hi lavi nchumu wo wu endla na Wona.” Va N’wi hlongorile, va N’wi xavisela ehandle, eka misava. A vari ehandle ka xinakulobye.

⁷⁶ Sweswi, hi ku endla sweswo, a va ri karhi va tekela ehandle ka ndhawu, va tekiwa ku rhelela eEgipta, endzhaku ka nkarhi.

⁷⁷ Sweswi, xitori xa vamakwavo lava va mavondzo hakunene i xa vufananisi bya kahle na tlheloa ra ximoya xa xona namuntlha.

Hinkwerhu ha—ha swi tiva sweswo, leswaku i mavondzo yo teng, ku ngari ku teng. Hi lawa ya khale, yo thyaka, mavondzo yo nyenjetsa. Ma vona? Ku hava ku teng eka mavondzo. Ma vona? A hi nchumu ehandle ka mavondzo yo nyenjetsa. Loko, va vona Bibele leyi fanaka, na ntumbuluko wa Xikwembu lexi fanaka lexi xi nga tsala Bibele, wu tiyisisa Xona n'winyi, kutani va ala Sweswo ehandle ka xivangelo. Ku teng... Kunene, ku ngari ku teng. Tani hilaha ndzi nga vula, i mavondzo yo thyaka. Ku langutisa Xikwembu xi ri karhi xi horisa vavabyi, xi pfuxa vafi, Xikwembu lexi fanaka lexi a xi hanya hi masiku ya vaapostola! Evhangeli leyi fanaka leyi va nga yi tsala, ya rendzo leri ra ximoya, i Xikwembu lexi fanaka lexi xi endlaka nchumu lowu fanaka. Kambe a va nchumu ehandle ka mavondzo, nakona va hlongorile, “Nakona a hi ngevi na Swona exikarhi ka vanhu va hina.” Ma vona? Va va hlongola!

⁷⁸ A va ehleketa, vamakwavo, leswaku a va nga ha ta pfuka va vile na ntirho hi wanuna wo kotisa luya, swingaleswi, “Hikokwalaho ka yini hi nga n'wi cukumeti?”

⁷⁹ Sweswi hi leswi, i nchumu wun'we lowu nga humeleta namunthla. Va ehleketa, leswaku, “Hikuva tikereke ta hina ti hundzukile ta vutlharhi, leswaku hi na mintshungu leyi ambalaka ku antswa, vandla leri kulukumba ku tlurisa, vachumayeri vo tlhariha ku tlurisa, leswaku a hi na ntirho na Moya lowo Kwetsima hi ndlela leyia Wu ri xiswona le ndzhaku.” Leswaku, va tele. Hi marito man'wana, mintirho yi vulavula yi rhasa ku tlula marito: Leswaku tiseminari ta vona, na bya vona... byongo bya kuva vona—vona hi vuvona, na ku hlangana kun'we ka vona na—na ku kanela nchumu lowu, va swi kota swinene, hi miehleketo ya swa vutlharhi bya vona vinyi, ku veika Kereke eka ntshamiseko, ku antswa ku tlula leswi Moya lowo Kwetsima wu nga swi endlaka. Swingaleswi, a va ha Wu lavi na swintsongo. “I Nchumu lowu hi nga ha wu laviki namunthla. I, masiku ya sweswo ya hundzile.” Sweswi, xana sweswo a swi lulamanga? [Nhlengeletano yi ku, “Amen.”—Muhleri.] “A hi lavi Moya lowo Kwetsima ku horisa vavabyi. Hi na madokodela. A hi lavi Moya lowo Kwetsima ku vulavula hi tindzimi. Hinkwerhu hi vanhu lavo tlhariha.” Kutani loko mi swi endla, mi teka, kona ku suka eka rimba ra mmiri wa n'wina, ntila wa Vutomi.

⁸⁰ Yesu u byerile vona Mayuda, hi masiku ya Yena, “Xana a mi swi hlayanga leswaku, ‘Ribye leri ri ariweke i ribye ra Yinhla leri muako hinkwawo wu tshameke ehenhla ka rona’?”

⁸¹ Sweswi, ma swi vona leswi ndzi swi vulaka? Ndza tshembha mi—mi nga swi kuma sweswo. Leswaku, e—e xivangelo xa swona sweswi, hikokwalaho kova va ehleketa leswaku a va nge pfuki va Swi lavile. “A hi lavi vavulavuri va tindzimi. A hi lavi vahlamuseti va tindzimi. A ha ha lavi vaprofeta va Testamente ya Khale kuva va hi veika eka ntshamiseko, hi Moya lowo Kwetsima. Ha Wu twisia.” Ma vona? Va hlayisile mafambisele

lawa ya endliweke hi munhu kuva ya teka ndhawu ya Moya lowo Kwetsima.

⁸² Hikokwalaho, ku na vanhu lava va nga hlawuriwa, va nga na mavito ya vona eBukwini ya Xinyimpfana ya Vutomi, va ngaka va ngayi eka sweswo. Va na miehleketo ya ximoya, hikokwalaho va ngaka va nga yi eka sweswo. Va ngaka va nga swi yimeli, swi ngari na mhaka loko kuri leswaku vatatana na vamanana va vona a va hanya eka kereke yihi na yihi ya vandla.

⁸³ Loko kereke yi endla, yi endla, kumbexani a yi nga ta vula sweswo ehandle. Oho, ee. A va nge swi vuli ehandle, kambe swendlo swa vona swa swi khorwisa. Hi *leri* Rito. Nakona Moya lowo Kwetsima wa swi khorwisa exikarhi ka lavaya, loko Wu nga kota ku va hlengeleta kun'we, leswaku Wa ha horisa vavabyi, na ku pfuxa vafi, na ku vulavula hi tindzimi, na ku hlongola madimoni. Swingaleswi, swi ya hi...leswi nga endzeni ka munhu.

⁸⁴ Manana Arganbright lahaya, a ehleketa sweswo, siku rin'wana, a tshamile ehandle lahaya endleleni, a ri karhi a tsuvula byanyi byin'wana, loko a ri karhi a tsema byanyi. Ndzi hundzile hi kwalahaya, kwalahaya etlhelo ka yena. A nga ndzi tivi, nakona ndzi lo n'wi tshika a ya emahlweni. A ndzi ri karhi ndzi langutisa.

Sweswi xiyisisani Moya lowo Kwetsima entirhweni wa Wona lowu kulu.

⁸⁵ Kereke yi titwa yi nga lavi Moya lowo Kwetsima. Tikereke ti ta mi byela sweswo. Nakona vavanuna va nga tlakuka va mi nyika tani hi mbulavulo wa vutlharhi byo tano, va nga mi endla mi lava ku swi pfumela. Sweswi a hi yimeni lahaya, xinkadyana. Xana Yesu a nga vulanga leswaku leyimbirhi yi tava ekusuhi swinene, "Swi ta kanganyisa na vona Vahlawuriwa loko swi koteke"? [Nhlenegetano yi ku, "Amen."—Muhler.] Mimbulavulo ya vutlharhi yi tava yi olovile swonghasi, leswaku yi nga—yi nga kanganyisa vanhu. I evhangeli, i vavanuna lava va nga khomaka rito lero hi ndlela yo tano, leswaku a nga lava ku endla munhu wihi na wihi wa vutlharhi, loko ntsena mi tshembherile eka vutlharhi bya vona, va—va nga ha avanyisa Moya lowo Kwetsima, na—na ku teka ndlela ya munhu. Ha swi vona sweswo.

⁸⁶ Sweswi, wolowo i nchumu wun'we lowu a va wu ehleketa hi mayelana na Yosefa, nakona va n'wi cukumetile. Nakona, oho, ehansi le Egipta, oho, hilaha hi nga ehleketa hakona, hilaha ndzi nga tirhisaka tiawara. Mi nga tshama lahawani ku ringana malembe manharhu nakona mi nga pfuki mi tshikile dyondzo yaleyo, vusiku na na nhlekanhi, nakona mi tama ma ha kuma timongo letikulu ta Moya lowo Kwetsima. Miehleketo ya ximoya yi nga langutisa ehansi le Egipta kutani yi vona ku xanisiwa lokuya ku pfuka; yi nga vona Yosefa a tekeriwa ekule, ku endlela

leswaku ku xanisiwa ku ta pfuka. Kutani yi vona Xikwembu, na vhilwa ra Xona emavhilweni, swilo hinkwaswo swi ri karhi swi famba-famba kwalahaya ntsena hi ku hetiseka. Yi vona Potifaro a ala Yosefa; yi vona vunwa lebyiya loko byi vuriwa. Kutani yi vona Yosefa ekhotsweni, na malevhu ya yena ya kurile, a tsemiwile eka vamakwavo va yena. Kambe manuku, xikan'we-xikan'we, Xikwembu xi nghena. Ma vona?

⁸⁷ Hilaha hi nga vonaka vhilwa leriya emavhilweni, ri ri karhi ri famba! Kungu lerikulu ra Xikwembu ri ri karhi ri fambisa swilo hinkwaswo kuya eka eksoda leyi, kuya eka nkarhi lowu loko Xi ta vitana vanhu va Xona endzhaku etikwени nakambe, endzhaku endhawini, eka xiyimo lexi Xi nga kotaka ku va katekisa na ku veka exikarhi ka vona Loyi Xi nga tshembhisa leswaku Xi ta n'wi veka exikarhi ka vona. A va fanele kuva etikwени ra vona. Tsundzukani, a va fanele ku humela ehandle ka tiko leri a va ri eka rona, kutani va nghena etikwени ra xitshembhiso, loko Mesiya wa vona loyi a nga tshembhisiwa a nga se ta.

⁸⁸ Nakona Kereke yi fanele ku endla nchumu lowu fanaka; ku huma eka ntlawa luwa wa vaari, ku nghena eka xitshembhiso, loko Mesiya a nga se vonakarisiwa emahlweni ka vona. Ma swi vona? [Nhlengeletano yi ku, "Amen."—Muhleri.] Vutomi bya Mesiya, byi vonakarisiwile, byi ri karhi byi lulamisa Kereke, Mutekiwa.

⁸⁹ Wansati u tekana na wanuna, nakona a kanetana na yena, ku ngava muxaka wa—wa mholovo, nkarhi na nkarhi. Kambe loko wanuna na nsati wa yena, ntombhi ya yena, loyi a nga tshembhisana na yena, loko va ri na ku twanana loku ku nga hetiseka, kukotisa moyo wun'we na miehleketo yin'we, hikuva va tava nyama yin'we.

⁹⁰ Kutani, loko Kereke yi nga fika eka ntwanano wo tani hi wolowo na Xikwembu, ku kondza ku vonakarisiwa ka Muteki ku vonakarisiwa eka Mutekiwa, hikuva va tava un'we! Oho, i dyondzo ya kahle njhani. Swi lulamile.

⁹¹ Sweswi, tsundzukani, miehleketo ya ximoya leyi yi kumaka leswi, yi nga ha vona xifananiso na ndzhuti wa xifananiso, nakona yi xi hlawula. Eka xin'we, ntsena, hi nga famba tiawara eka xona. Langutisani leswi swi humelalaka.

⁹² Nakona hikokwalaho ka yini hi yimile malembe lawa hinkwawo, hi mpfhuka ka xihlovo-mananga lexi xa nkarhi? Ma swi tiva, Bibele yi vulavula, leswaku, "Kereke yi balekerile emananga, laha yi nga phameriwa ku ringana nkarhi na nkarhi." Nakona hikokwalaho ka yini leswi hinkwaswo swi vile kona? Leswaku hi... Ma vona? Ku tama ka hari mavhilwa ya Xikwembu emavhilweni.

⁹³ Hikokwalaho ka yini Xikwembu xi nga swi endlanga leswi, nkarhi wo leha lowu nga hundza, loko vavanuna va ta tshama ehansi na tipensele, na—na vavasati, na ku ringeta ku dirowa

ntsena nkarhi? Ku kotisa Muavanyisi Rutherford na votala va vona, leswaku, "Yesu u tile hi '14." Nakona—nakona Manana Shipton u vile na swona le ndzhaku ka sweswo, na swin'wana na swin'wana, minkarhi hinkwayo. Nakona, ma vona, loko va ri karhi va famba hi leswi, hi leswi va nga ringeta ku twisia Matsalwa, ma vona, va ma onhile. Ma fihliwile. Kahle-kahle ma fihliwile. Nakona swi nga kotekaza ku yini kuva Matsalwa ma famba ku lwisana na Rona n'winyi, loko Yesu a te, "Ku hava munhu loyi a tivaka minete kumbe awara"? Ma vona? Ma vona? Ntsena va kuma xiphemu xin'we xa Matsalwa kutani va Xi khoma.

⁹⁴ Mi fanele ku teka Nchumu hinkwawo. Kutani, loko Xikwembu xi ri eka sweswo, kutani Xikwembu xi ta vonakarisa sweswo kuva swi ri Ntiyiso. Tani hi ku horisa ka Vukwembu, loko ku ngari Ntiyiso, kutani a hi Ntiyiso; Xikwembu a xi ngevi na nchumu wo wu endla na kona. Kambe loko Xi Ku vonakarisa kuva kuri Ntiyiso, kutani Ku Ntiyiso. Ntsena tani hilaha Yesu...

⁹⁵ Xikwembu xi te, "Loko kuri na un'wana exikarhi ka n'wina, loyi a nga muprofeta, kumbe kuva wa ximoya, Ndzi ta vulavula na yena. Nakona loko leswi a swi vulaka swi humeleta, kutani swi yingiseni. Sweswo hi swona. Kambe loko vuprofeta bya yena byi hoxekile, kutani..." Xikwembu xi ngaka xi nga hoxisi. Xi hilaha ku ngariki na makumu, a xi hoxisi, xi ni matimba hinkwawo, nakona Xi ngaka xi nga hoxisi. Swingaleswi, loko wanuna a ri karhi a vulavula, kutani swi kombisa wanuna. Loko a vulavurile marito ya yena n'winyi, ya ta tsandzeka. Kambe loko a vulavula Marito ya Xikwembu, ya ngaka ya nga tsandzeki, hikuva i Xikwembu xi vulavulaka. Kutani, huhutelo wa yena wu huma eka Xikwembu, nakona wu ta...ntsena wu fanele kuva lowu lulameke. Yaleylo i ndlela leyi Xikwembu xi nga vula leswaku swi vuriwa ha yona. Yaleylo i ndlela leyi Bi-...

⁹⁶ Eka Testamente ya Khale, Xi te, "Loko va nga vulavuli kuya hi nawu na vaprofeta, swi hikokwalaho kova va ngari na Vutomi eka vona, ku hava Rivoni endzeni ka vona." Swi lulamile. Va fanele ku vulavula kuya hi nawu na vaprofeta. Nakona vuprofeta, kumbe xin'wana na xin'wana, xi fanele xi va kuya hi Rito. Loko xi ngari tano, xi hoxekile. Ma vona?

⁹⁷ Sweswi, hi kuma leswaku leswi hinkwaswo swi humelerile, hikuva, swi rindzerile. Mimpfuxelelo: Mamethodist, Malutheran, Mabaptist, Macampbellites, na—na hinkwavo vo hambana-hambana. Va vile na mimpfuxelelo leyikulu. Manazarine, Pilgrim Holiness, Mapentekosta, hinkwavo va vile na mimpfuxelelo leyikulu. Kambe eksoda leyikulu a yi se ta. Hikokwalaho ka yini? Xikwembu xi byerile Abraham leswaku Xi ta n'wi hlayisa etikweni nkarhi luwa, kambe e—e vudyoho bya Vaamori a byi nga se tala. Nakona Xikwembu xi rindzerile, xi lehisza mbilu. Vona vanhu, lava va ringetaka

ku twisia, va nga vona Matsalwa ya tsutsumela eka nchumu wun'wana. Ya tsutsumela eka nchumu wun'wana, va te, "Leri i siku ra kona. Lowu i nkarhi wa kona." Kambe mi tsandzeka ku twisia leswaku ku homboloka ka Vaamori a ku se fikeleleka.

⁹⁸ Mune wa madzana ya malembe a va ta tsendzeleka ehansi lahayah e Egipta, kutani va humesiwa. Kambe kahle-kahle va tshamile mune wa madzana na makume mune wa malembe, hikokwalaho ka ariwa ka muprofeta. A va fanele ku xaniseka man'wana, kwalomu ka makume mune wa malembe ehansi lahayah emananga, loko Xikwembu xi nga se va humesa. Muxe a ri ehandele emananga makume mune wa malembe loko a nga se tlhelela endzhaku ku ya va kutsula, ma swi vona. Makume mune wa malembe ma yile eka nkarhi wo engeteleta, ma hundzeriwa, hikokwalaho kova va arile hungu.

⁹⁹ Sweswi, makume mune wa malembe hi nkarhi wa Xikwembu a ku tava kwalomu ka n'we na hafu ya timinetse, eka nkarhi wa hina. Sweswo hi leswi ku hambana ku nga xiswona. "Gidi ra malembe i siku rin'we ntsena." Ma vona? A ma nga tava hambi kuri minete, hi ku tika. Xiyisisani, eka sweswo.

¹⁰⁰ Sweswi hi le ku hlweleni. Hikokwalaho ka yini? Xikwembu a xi ri karhi xi tiyisela, xi rindzerile, xi langutisile. Xi pfumelela e—e Malutheran ma pfuka hi mpfuxelelo, kutani va kondletela. Xi pfumelela Mamethodist ma pfuka hi mpfuxelelo; va kondletela. Xi pfumelela John Smith, kereke ya Baptist, yi pfuka hi mpfuxelelo lowukulu; va kondletela. Xi pfumelela Mapentekosta ma pfuka hi ku tlheriseriwa ka tinyiko; va kondletela. Kukondza ku homboloka ku tala, kutani Xikwembu xi karhala, kutani hi loko ku ta eksoda.

¹⁰¹ Nakona ha swi vona, leswaku vanhu hi voxé va nga ha vona endzhaku ku rhelela hi nkholukó wa nkarhi, leswaku nchumu wu rhukaniwile. Va teka xitlhenguso na nguvu ya kahle ya Xibabilona, nakambe. Nakona wolowo i nchumu lowu rhukanaka exikarhi ka vanhu, loko vanhu va ringeta ku tlhavela mavonelo ya vona vinyi hi mayelana na swilo.

¹⁰² Hi fanele ku tshama na Rito lero. Lero i milawu ya Xikwembu, a kuri leswaku, "Mi nga khumbhi nchumu edorobeni leriya, doroba leri rhukaneweke. Mi nga swi khumbhi. Swi tshikeni swi ri swoxe."

¹⁰³ Nakona Akan a ehleketa leswaku a ta teka xitlhenguso lexi xa nsuku kutani a hanya ku saseka kukotisa misava hinkwayo, na nguvu ya kahle ya Xibabilona. Oho, eka Vaakan emixaxeni! Ma vona? Kambe nchumu wolowo wu rhukaniwile, nakona wu rhukanawa ku yisa emahlweni. A wu rhukaniwile hi mpfukwa ka Nicene Council, eNicaea, Rhoma, wu rhukaniwile hi mpfukwa ka sweswo. Kambe Xikwembu xi pfumelerile ku homboloka ku tala, ku kondza nkarhi wa Vaamori wu lava ku fikelela.

¹⁰⁴ Nakona sweswi mani na mani loyi a nga na matwisisile ya ximoya, tsundzukani, ndzi tshamela ku tshaha, matwisisile ya *ximoya*, mi nga ha swi vona leswaku ku homboloka ka tiko leri ku tele. Ri kondleteriwile na ku kondleteriwa ra vumbirhi, na ku kondleteriwa na ku kondleteriwa. Nakona sweswi ri hlanganerile, na ku hlangana na swin'wanyana. Ku homboloka ku tele. I nkarhi wa eksoda, nkarhi wa ku vitanela ehandle, eka Tiko leri nga tshembhisiwa. Ku ngari xitshembhiso, ntsena tiko rin'wana ro ya eka rona; kambe Kaya, Mileniyamu, nkarhi wa ku vitanela ehandle. Ku homboloka ka tiko leri (ku ba eka rona nakambe vusiku lebyi, loko Hosi yi swi rhandza) ku tele. Ri thyakile.

¹⁰⁵ Mi ri, "Makwerhu Branham, tiko leri u tshamaka eka rona?" Ina, nkulukumba. Hakunene. Mi ri, "Tani hi muaka-tiko wa United States, a wu fanelanga ku vula sweswo." Kutani, Eliya a nga fanelanga kuva a vitanile ndzhukano ehenhla ka Israel, na kuva yena a vile Muisrael hi nkarhi luwa. Vaprofeta lavan'wana a va nga fanelanga kuva va rhukanile tiko leriya a va ri Vaisrael ehansi ka rona.

¹⁰⁶ Kambe va vulavurile ntsena, ku ngari mianakanyo ya vona, kambe Rito ra Xikwembu. Ma vona? Swi ya hi laha u kokaka huhutelo wa wena kona. Swi ya hilaha swi taka hakona. Loko swi hambana na Rito, swi tshikeni swi ri swoxe. Ndzi kombela mani na mani kuva a khorwisa leswaku Sweswo swi hambanile na Rito.

¹⁰⁷ Xana Bibele a yi vulanga, eka Nhlavutelo 13? Kwalano hi laha tiko leri ri humeletlaka kona. Tiko leri ri nyikiwile nhlayo ya khume nharhu, tiko ra wansati. Ri wansati, eBibeleni. Wansati u le ka swingwece swa hina. I tiko ra wansati. Hi laha ku bola ka vavasati ku sungulaka kona, ku sungula, laha ku heteletlaka kona. Ku bola ku sungurile e Eden, hi ku kala ku pfumela Rito ra Xikwembu. Lahawani hi laha ku nga tlhotlhora vachumayeri va vavasati na leswin'wana hinkwaswo. Thyaka ra misava ri ta ri huma eHollywood, tiko ro biha ku tlurisisa emisaveni; ku thalana ko tala, misava hinkwayo yi vekiwile kun'we. Ma vona? Hikokwalaho ka yini? Mi ta swi kumisisa eka rin'wana ra masiku lawa, loko Hosi yi swi rhandza. Mi ta swi vona leswaku hikokwalaho ka yini, nchumu lowu wu rhukaniweke. Mi nga byi vona vubofu bya swilo leswi swa ku thalana loku Sathana a nga ku kokela ehenhla ka matihlo ya vanhu. Hi le ka awara yo chavisa. Makumu ya hina ya le kusuhi sweswi, ndza pfumela. Va borile, ku bola ku fika ensinghweni.

¹⁰⁸ Ri humeleta eka Nhlavutelo 13, nhlayo ya vukhume nharhu. Nakona tsundzukani, ri pfukile kukotisa xinyimpfana, ntshuxeko wa vukhongeri. Kambe manuku ri kumile matimba ku suka eka xivandzana; xifaniso xo fana na xona. Nakona xi vulavurile hi matimba hinkwawo, na ku endla swilo sweswiya swo bola leswi xivandzana xi nga swi endla emahlweni ka xona.

Kutani mi ndzi byela leswaku a swi profeteriwanga tiko leri? Xiyimo xa Vaamori xi le kusuhi na ku yupfa, hikuva i khale va ri karhi va tirhana na xona.

¹⁰⁹ Hambi kuri phophu wa hina lontshwa, xikongomelo nkulu xa yena i ku hlanganisa vamakwerhu kun'we. Nakona, eka tihlo ra ntumbuluko, i nchumu lowu faneleke ku endliya. Kambe, ematihlweni ya Xikwembu, wa hambana na Moya lowo Kwetsima. Hi ngaka hi nga tihlanganisi na sweswo. Nakona kereke yin'wana na yin'wana yi ta vitaniwa eka nhlanganelo walowo. Humani eka nchumu wolowo, hi kuhatlisa hilaha mi nga kotaka hakona. Mi ta teka mfungho wa xivandzana, mi ngari eku tiveni ka leswi mi swi endlaka. Humani eka wona.

¹¹⁰ Ndza tshembha leswaku miehleketo ya ximoya ya swi khoma. Ndza tshembha leswaku ma swi khoma. Kambe ndza hlamala, ehandle lahaya. Hambiswiritano, mi ngaka mi nga endzeli tiko rin'wana na rin'wana. Mi nga rhumela tithepi eka rona. Xikwembu xi tava na ndlela yin'wana yo khoma miehleketo yaleyo le handle laha mbewu liya yi nga byariwa kona. Swi lulamile. Kutaku loko Rivoni ri yi tlhava [Makwerhu Branham a phokotela mavoko ma yena kan'we—Muhleri.], yi famble, yi teka Vutomi. Kukotisa wansati lontsongo exihlobyeni, u te, "Hi Lebyiya." U Byi khomile.

¹¹¹ Humani eka nchumu wolowo. Wu rhukaniwile. "Rhukaniwile?" Ndzi byeleni kun'we laha un'we a nga tshama a wa a tlhela a pfuka nakambe. Ndzi byeleni un'we loyi a nga tshama a pfuka loyi a nga wanga. Swingaleswi, mi nga swi vona leswaku nchumu wa kona wu hoxekile. Swi lulamile.

¹¹² Ku homboloka a ku nga se tala, bya Vaamori, swingaleswi a va fanele ku tshamela na ku rindzela loko eksoda yi nga se fika. Kambe loko Vaamori va tava va tatisile ku homboloka ka vona, kutani hi loko ku ta eksoda ya ximoya, kumbe eksoda ya ntumbuluko, ku rhangela vanhu kuya etikweni ra ntumbuluko, laha Muamori wa ntumbuluko a nga kala a tshama kona, va vitana rero tiko ra vona.

¹¹³ Nakona ku homboloka ka dinominexini ya Vaamori va tivitanile "Kereke," nkarhi wo leha swonghasi, ku kondza ku homboloka ka vona ku lava ku fikeleleka.

¹¹⁴ Ku le kuteni ka eksoda, laha Xikwembu xi nga ta kombisa leswaku mani i mani; laha Kereke hi Yoxe, Mutekiwa wa Yesu Kreste, a nga ta eksodariwa ehandle, ku nghena eTikweni leri nga tshembhisawa. "Endlwini ya Tatana wa Mina kuna vuako byo tala, eka ndhawu leyi." A mi boheki kuya lahaya mi ya lwa kukotisa leswi va nga endlisa swona. Yi lulamisiwile khale. Loko vutshamo bya tabernakele leyi ya le misaveni byi n'okisiwa, hi na byin'wana lebyi byi nga rindzela, "Leswaku laha Ndzi nga kona, na n'wina mi tava kona." Eksoda leyikulu yi kusuhi!

¹¹⁵ Langutisani hilaha Xikwembu xi nga endla eksoda yaleyo, leswi Xi . . . i ku lulamisela kwihi loku Xi nga ku endla, nakona mi hlaya xinkadyana, kutani mi langutisa namuntlha. Swi lulamile. Xiyisisani, loko ku nga seva na eksoda leyi, “Ku pfukile e—e faro loyi a nga n’wi tivangiki Yosefa.” Ma vona? Faro loyi a nga n’wi tivangiki Yosefa. “A nga n’wi tivanga Yosefa.” Xana Yosefa a yimeriwa hi yini? Xiphemu xa ximoya eka eksoda leyi ya ximoya.

¹¹⁶ Ku le ku pfukeni sweswi, “Hi hina ntshuxeko.” (“Wansati u phameriwile nkarhi wun’we, minkarhi mimbirhi, na hafu ya nkarhi.”) Kambe eku heteleleni ku pfukile e—e Yos— . . . kumbe mulerisi wa faro loyi a nga wu tivi ntshuxeko wa vukhongeri, a va hlanganisa kun’we. Mi nga swi tshiki swi mi hundza. Ku tile nkarhi laha a kuri na faro, ku sungula, a fanele ku ta.

¹¹⁷ Nakona mavandla a ma hanya ku tiphina, ma hanya tani hi marhavi lawa ya nga temiwa, eka mudiriva wa xiviri wa Vukreste, kambe wu tama wa ha tswala mihandzu ya wona ya ntiyiso: vavasati, va ambarile hafu; vavanuna, va tlharihile, na ku tsan’wa matimba ma Moya. Kambe, wu hanyile ehansi ka vito ra kereke ya Xikreste. I mudiriva lowu wu nga temiwa. Kambe Murimi u le kuteni sweswi ku ta tshena mudiriva wolowo, tani hilaha A nga vula leswaku U ta swi endla. Hinkwavo lava va nga riki na mihandzu va tsemiwa va hoxiwa endzilweni kutani va hisiwa.

¹¹⁸ I nchumu wo chavisa ku wu vula, kambe Ntiyiso nkarhi wun’wana wu tikomba wu chavisa, tani hilaha ndzi nga mi byela, hilaha Xikwembu xi tekaka vana va Xona ku hundza hi le matini yo enta na sava ra ndzhope na swin’wana. Xi swi endla hi ndlela yaleyo. Tsundzukani, e—e poto ri fanele ku fayiwa ri va ku rhurhumela, tinyandza, swiphemu leswintsongo kuva ri vumbiwa hi vuntshwa na ku gayiwa nakambe. Swi languteka tani hi nchumu wo chavisa ku ri onha, kambe ri fanele ku endlisiwa xisweswo, ku endlela kuva poto ri endliya hi vuntshwa nakambe, bodlhela ra swiluva kumbe xihi na xihi lexi mi xi endlaka.

¹¹⁹ “Ku vile na faro loyi a nga pfuka, loyi a nga n’wi tivangiki Yosefa.” Nakona sweswo a kuri masungulo ya masungulo. Sweswo a kuri masungulo ya eksoda. Nakona loko nchumu wolowo wu sungula ku vumbeka, ehansi ka—ka matimba ya xipolotiki, wu sungula ku vumbeka, Xikwembu xi sungurile ku lungheka. Ku homboloka ka Vaamori a ku fikelelekile. Nkarhi lowu Xi nga wu tshembhisa Abraham a wu fikelelekile, nakona nkarhi wa ku kutsuriwa a wu ri ekusuhi.

¹²⁰ Nakona Xikwembu xi pfumelerile faro kuva a pfuka, loyi a nga n’wi tivangiki Yosefa, nakona Ramses u tswarewile. Nakona endzhaku ka Seti ku tile Ramses. Nakona Ramses a kuri luya a nga yi tivi minkateko ya Yosefa. Nakona—nakona a nga swi

tivi leswi tlhelo ra ximoya a ri ri xiswona. Ntsena a ri ntlharhi ya xipolotiki, leswaku a ta teka Ethiopia na hinkwawo matiko laman'wana, ehansi ka matimba ya mavuthu. Nakona sweswo a kuri swona ntsena leswi a swi tiva, a kuri e—e matimba ya mavuthu.

¹²¹ Nakona ndza ehleketa, loko mani na mani a ri wa ximoya, a ta vona leswi swi tekaka ndzhawu sweswi. Hi le ku kumeni ka faro loyi a nga wu tiviki ntshuxeko wa vukhongeri. Loko presidente wa hina a teka hofisi yakwe, a nga ta hlambanya eka sweswo, leswaku a pfumela eka ntshuxeko wa vukhongeri.

¹²² Mi ri yini hi siku rin'wana loko hi vile na xivutiso xa ku avana, ehansi le Dzongeni? Loko gavhenara wa—wa Alabama . . . Ndzi navela ingaku ndzi nga vulavula na holobye luya, luya Martin Luther King. Xana wanuna loyi a ngava murhangeri njhami, nakona a rhangela vanhu va yena kuya eka ntlhamu wa rifu? Loko kuri leswaku vanhu lava a vari mahlonga, a ndzi tava ndzi ri kwalahaya, ndzi hluvurile bajri mina, ndzi ri karhi ndzi betetela vanhu lavaya. A hi vona mahlonga. Hi vona vaaka-tiko. Hi vona vaaka-tiko va tiko. Xivutiso xa “ku ya exikolweni.”

¹²³ Vanhu va kona, loko va ri na timbilu to nonoha nakona va nga swi tivi swilo leswiya. U ngaka u nga nghenisi endzeni ka vanhu, swilo swa ximoya, leswi swi biwaka kwalahaya hi matimba ma tipolotiki. Va fanele ku swi amukela, va tswariwa ra vumbirhi, kutani va ta vona swilo leswi.

¹²⁴ Kambe, wanuna loyi, ntsena loko ndzi nga vulavula na yena; ku rhangela vanhu lavaya vo hlawuleka, ehansi ka vito ra vukhongeri, kuya eka ntlhamu wa rifu laha a nga ta dlaya magidi ku andzisa hi magidi ya vona! A va . . . Ntsena va kuma e—e tlhelo ra swa ntumbuluko.

¹²⁵ Wanuna loyi, makwerhu loyi wa mukhaladi, loko dzolonga leriya ri kulukumba ri ta ta eLouisiana, a ndzi ri kwalahaya hi nkarhi wa kona. Loko e . . . Ku na muchumayeri wa mukhaladi, makwerhu wo hlawuleka wa mukhalabya, u tlakukile ehandle kwalahaya kutani a ku, a vutisa masocha, “Xana ndzi nga vulavula na vona-ke? I vanhu va ka rikwavo.” Kutani muchumayeri loyi wa mukhalabya a tlakuka, ehandle lahaya, a ku, “Ndzi lava ku vula, mixo lowu, a ndzi se tshama ndzi va ni tingana hi mbala wa mina. Muendli wa mina u ndzi endlile leswi ndzi nga swona.”

¹²⁶ Yaleylo hi yona ndlela leyi A lavaka leswaku ndzi tshamisa xiswona. Yaleylo hi yona ndlela leyi A lavaka munhu un'wana na un'wana a tshamisa xiswona. U endla swiluva swo basa, na swiluva swa wasi, na mihlovo hinkwayo ya swiluva. Mi nga swi pfanganyisi. Mi nga swi hlanganisi. Mi lwisana na ntumbuluko.

¹²⁷ U te, “A ndzi se tshama ndzi va ni tingana hi mbala wa mina, ku fika mixo lowu.” A ku, “Loko ndzi vona vanhu va ka rikwavo va pfuka nakona va endla swilo leswi va nga eku swi

endleni sweswi,” a ku, “swi ndzi endla ndzi khomiwa hi tingana hikokwalaho ka vona.”

Ndzi ehleketa, “Xikwembu, katekisa rito lero.”

A ku, “Ntsena mi ya eku vangeni ka xiphijo.” A ku, “Langutisani swikolo lahawani. Loko a hi ngari na swikolo,” a ku, “a swi tava swi hambanile. Kambe xana i vamani lava va nga na swikolo swa kahle ku tlurisa laha eLouisiana?” A ku, “A hi tekeni, hi xikombiso, doroba ra hina, Shreveport.” A ku, “Ku na xikolo xa valungu lahaya, i xikolo xa khale. Va hi akerile xin’wanyana. Va hava xichaya-chayani na xin’we, nchumu wun’we wo tlangisa wa vana. Hina hi na jarata leri nga tala. Nakona ehandle ka sweswo, va hi akerile xa kahle, lexikulu, xidziva xo hlambela kona xa ribye ro saseka xa vana va hina. Nakona hi na vadyondzisi va kahle ku tlurisa lava va nga kumiwaka.” A ku, “Hikokwalaho ka yini mi lava kuya lahaya, loko hi ri na xo antswa lahawani? Xana xiphijo i yini hi n’wina?” ku vula yena.

¹²⁸ Kutani vanhu va kona, va, “Raa!” Va dlaya rito leriya. Hi sweswo, ma vona, huhutelo wo hoxeka.

¹²⁹ Vanhu lava a vari mahlonga. Hi vona vamakwerhu va mina va xinuna na va xisati. A vari mahlonga, a ndzi ta ku, “Ntsena a hi hlanganeni na vona kutani hi rhelela hi xitarata nakona hi kaneta nchumu luwa.” A hi vona mahlonga. Hi vona vaakatiko lava va nga na timfanelo tin’we na leti mani na mani a nga na tona. Ntsena kova nyandza ya huhutelo lowu wu humaka etiheleni, ku vanga leswaku miliyoni ya vona yi dlayiwa. Va sungula xilwisa-mfumo. Hakunene, hi xona. A xi lulamanga.

¹³⁰ Vavanuna na vavasati va na timfanelo ta vona vinyi. Vamakwerhu va hina va makhaladi, na Majapani, na lava va xitshopani, vobasa, vantima, na hambi ku ngava yini leswi va nga swona, ku hava ku hambana eka mbala wa vona, hi Xikwembu. Hinkwerhu hi huma eka wanuna un’we, Adam. Kambe loko kuri leswaku Xikwembu xi hi hambanyisile na ku hi hundzula hi va mimbala yo hambana, a hi tshamiseni xisweswo. Loko a ndzi ri e—e munhu wa xitshopani, a ndzi ta lava ku tshama ndzi ri Mujapani, kumbe Muchayina. Loko a ndzi ri e—e munhu wa mukhaladi, a ndzi ta lava ku tshama hi ndlela yaleyo. Xikwembu xi ndzi endlile hi ndlela yaleyo.

¹³¹ Ku ya hi ntiyiso, ku na swotala hi rixaka ra makhaladi leswi rixaka ra valungu a ri fanele kuva na swona. A va na ku vilela. I va ximoya swinene. Ku na swilo swa magidi-gidi mayelana na vona leswi valungu va nga ta ka va nga swi khumbhi. Xikwembu xi va endlise xisweswo.

¹³² I mani loyi a nga ta pfuka a yimbelerile ku tlula khwayere ya makhaladi? Mi nga ma kuma kwih marito? Ndzi va vonile va ta ku suka ematikweni endzhaku lahaya, va nga swi tivi kuri hi rihi, voko ra xinene na ra ximatsi. Makume nharhu

kumbe makume mune wa tinxaka to hambana-hambana ta vona, nakona va yimbelela endhawini, varhangeri va yima hi lahaya, va ku, "Ntsena ndzi ngaka ndzi nga yi khumbhi." U yimbelerisile tikhwayere ku ringana malembe, nakona yin'wana a yi tava yi ri na noti leyi hambaneleke ehenhla, na le hansi, na hinkwaswo. A ku, "Yingiselani sweswo, ntsena hi ku hetiseka, hambi kuri hi ririmbi ro hambana." Va nyikiwile.

¹³³ Kambe, ma swi vona, hinkwaswo swilo leswi swi fanele ku humelela, hinkwaswo hikokwalaho ka n'wa-tipolotiki loyi n'wina vanhu mi nga n'wi hlawula hi michini ya n'wina ya vumbabva.

¹³⁴ Nakona siku rin'wana, loko gavhenara luya a yimile lahaya, a hlambanyiwile na ku hlawuriwa eka hofisi liya, hi vanhu, nakona xivutiso xa ku avana ku ya hi vumbiwa, leswaku tiko rin'wana na rin'wana—rin'wana na rin'wana ri nga teka mavonele ya rona n'winyi mayelana na sweswo. A ngari na mhaka, kambe u hlayile vumbiwa, a ku, "Sweswi, xikolo xi yimele ku avana." Va na xikolo kwalahaya. Nakona kova vana vambirhi ntsena va makhaladi lava a va lava ku nghena exikolweni lexiya, loko va ri na kholichi ya vona vinyi. Kambe u tlakukile a ku, "Yini?" Na yena u hlayile vumbiwa.

¹³⁵ Kutani loko swi vuyela endzhaku eka nakulorhi loyi hi nga na yena lahawani, loyi a nga tiviki Yosefa, ntshuxeko. Ku kokela tivhothi letiya ta makhaladi, na ku ka va ngari eku swi tiveni leswaku i vandla ra rhiphabliko leri ri nga va ntshuxa, endzhawini leyo rhanga. Ku xavisa timfanelo ta vona ta ku tswariwa, eka nchumu wo tani hi wolowo, ku va rhangela kuya eka ntlhamu wa rifu, ku kombisa leswaku mafambisele man'wana na man'wana lama ma endliweke hi munhu ma fanele ku wa. Hakunene swi lulamile. Nakona Nkul. Kennedy u endlile leswaku vurindzi byebyo byi fumiwa hi tiko, na ku rhumela vavanuna lavaya endzhaku eswikandzeni swa vatatana va vona vinyi lava yimeke ehansi ka vumbiwa. Sweswo swi tshovile vumbiwa nakambe.

¹³⁶ U te, "A hi nge lwi. Ee, nkulukumba." Kutani a ku, "Ndzi tshembha leswaku tiko ri ta swi kumisia leswaku a ha ha hanyi ehansi ka xidemokrasi, kambe ehansi ka ku lerisa ka masocha."

¹³⁷ Ma xi tiva xivuriso xa khale, "Loko u tshame u va mudemokrati wa le dzongeni, u tshama u ri yena." A ndzi swi tivi sweswi. Ahaa. Hakunene wanuna u tava na ku twisisa ko ringanelu ku pfukela eka swin'wana. Ma vona? Tshikani vanhu lavaya vo hlawuleka va ri vox. Mi nga va dlai, ehansi lahaya.

¹³⁸ Ku kotisa nakulorhi luya a nga balesela makwerhu luya enhlaneni, vusiku byin'wana, hi xibalesa lexiya, na swihlangi swa yena na nsati endzeni ka yindlu. A ndzi na mhaka leswaku hi yena mani, sweswo i mona na kuva swi nga tivikani. Ina, nkulukumba. Ndzi nga tsakela ku va muavanyisi eka nandzu

wolowo, kan'we. Ahaa. Ahaa. Ku balesela wanuna luya, a ya ekaya eka nsati wa yena na vana. Hi yena muaka-tiko, u na mfanelo yo yimela leswi a ehleketa ka leswaku swi lulamile, wanuna wa 'kahle. Xifaniso eka *Life* magazine, xifanyetana lexiya xi ri karhi xi rilela papa wa xona. Nakona mugwinihii un'wana le handle, u n'wi baleserile enhlaneni, hi ku tumbelela.

¹³⁹ Sweswo hi leswi u swi kumaka loko u ala Kreste. Hi swona sweswo. Kwalaho hi laha tiko hinkwaro ri nga fika kona, hinkwaswo ehansi ka tipolotiki. I tingana njhani, kambe sweswo hi leswi hi nga swi lava. Hi swi khorwisile eka nhlawulo lowu.

¹⁴⁰ Jaha ra mina lerintsongo ri ndzi byerile, mixo lowu leswaku, "Papa, vatatana va vaendzeri, loko va tava va tile lahawani, xana hinkwavo ka vona a va wela eka dinominexini ya kereke *leyi* yo karhi? Xana hinkwavo ka vona . . ." Ri ku, "A va ambarile majasi lamakulu?"

¹⁴¹ Ndzi ku, "Ee, murhandziwa. Va ta lahawani hikokwalaho ka ntshuxeko wa vukhongeri. Sweswo hi leswi va telaka swona, ku huma ehansi ka swilo swo tani hi leswiya." Ma ku vona laha swi nga fika kona sweswi? Swi kombisa leswaku hinkwayo mimfumo leyi yi fanele ku wa.

Ndzi fanele ku hatlisa.

¹⁴² Nchumu wun'we, ndza khongela leswaku Makwerhu Martin Luther King hakunene u ta pfuka ku ngari khale. U rhandza vanhu va ka rikwavo; a kuna ku kanakana. Kambe ntsena loko a vona laha huhutelo wa yena wu nga kona. Xana swi nga pfuna yini loko mo ya exikolweni, miliyon i ya n'wina yi etlerile lahaya, yi file? Xana ntsena a swi nga tava, kuya exikolweni, ntsena hilaha ku fanaka? Sweswi, hikokwalaho ka—hikokwalaho ka ndlala, loko a kuri swa nchumu wun'wanyana, mahlonga, wanuna luya a tava a ri muxanisiwa kuva a nyikela vutomi bya yena hikokwalaho ka nandzu wolowo, xivangelo lexi xi ringaneleke, nakona xexo a xi tava xi ri xivangelo lexi ringaneleke. Kambe ntsena ku ya exikolweni, a ndzi—ndzi swi voni. Ma vona? A ndzi pfumeli leswaku Moya lowo Kwetsima wu le ku pfumelelaneni na yena, na swintsongo, eka sweswo. Swi endlile leswaku vanhu va hlanganana, hi ntlawa wa mholovo, ma swi vona.

¹⁴³ Ntsena—ntsena tani hilaha Hitler a nga endla hakona, lahaya eJarimani, u va rhangerile kuya eka ntlhamu wa rifu, vona Majarimani vo hlawuleka. Nakona va etlerile hi mabiliyoni, kumbe mamiliyoni, va fumbiwile kwalahaya un'wana ehenhla ka un'wana.

¹⁴⁴ Nakona sweswo hakunene i nchumu lowu fanaka. Nakona tsundzukani, ndzi le ka thepi. Mi ta swi vona, endzhaku, kumbexani endzhaku ka loko ndzi fambile. Sweswo hi leswi hakunene swi yaka eku humeleleni. Vanhu lava vo hlawuleka va ta fa ehansi lahaya, kukotisa tinhongani. Va sungula mulwisa-

mfumo, ha vumbirhi valungu na makhaladi va ta lwa nakambe, nakona va fa ku kotisa tinhongani. Kutani xana mi kumile yini loko hinkwaswo swi herile? Nhulu ya vanhu vo fa.

¹⁴⁵ “Kambe ku pfukile faro loyi a nga n’wi tivangiki Yosefa.” Nchumu lowu fanaka namuntlha, wanuna u pfukile nakona a teka xihlambanyo eka—eka White House, loyi a nga taka a nga hlambanyi eka xihlambanyo xa yena, a nga taka a nga teki xihlambanyo xa yena leswaku u pfumela eka ntshuxeko wa vukhongeri.

¹⁴⁶ Xana phophu loyi lontshwa u ri yini? Xin’we... Mune wa swilo leswi a nga na swona. Xin’we xa swona, i ku hlanganisa Protestant na Khatholiki kun’we. Kutani eka munhu wihi na wihi wa vutlharhi, wolowo i nchumu wo wu endla. Kambe kuya hi Bibele, i nchumu wo hoxeka ku wu endla. Nakona Bibele yi virule leswaku va ta endla sweswo.

¹⁴⁷ A hi yeni emahlweni nyana. Hi nkarhi lowu, Ramses, eEgipta, a ri karhi a kula. Matimba ma yena ma le ku kuleni. Wanuna wa ntumbuluko, Ramses, a ri karhi a kula.

¹⁴⁸ Wanuna wa ntumbuluko, antikreste, u le ku kuleni sweswi. Hi tipolotiki, se i khale a nghanile eWhite House. Eka vukhongeri, u endlile leswaku vanhu hinkwavo va fa mapfalo, ku kondza hakunene-nene va yengiwa hi swona. Na varhangeri va xidinominexini, kahle-kahle kereke yin’wana na yin’wana leyi yi nga kona etikweni, se i khale yi ri eka nhlanganelo wa tikereke. Ramses u le ku kuleni. Nakona hinkwavo va le ku hlanganeni kun’we, nakona sweswo hi leswi va nga tava na swona. Kutani xana swi endla yini? Swi endla matimba, xivandzana kukotisa lexiya xo rhanga.

¹⁴⁹ Kutani ku na ku xanisiwa loko ku taka ehenhla ka lavaya va nga taka va nga hlangani na xona, na xikhirhi. Xi tava xi hlwerile kwalaho. Mi tava mi tekile mfungho. Mi nga vuli leswaku, “Ndzi ta swi endla hi nkarhi wolowo.” Swa antswa mi swi endla sweswi. Ramses a ri karhi a kula.

¹⁵⁰ Kambe tsundzukani, loko Ramses a ri karhi a kulela eka matimba, e Egipta, Xikwembu a xi ri na Muxe emananga. A ri karhi a kula, na yena. Ramses a ri na mafambisele ya xipolotiki. Xikwembu a xi ri na mafambisele ya ximoya, ehansi ka muprofeta, loyi a lulamerile ku ta ehansi, a ta vulavula na vanhu.

¹⁵¹ Ha vumbirhi va le ku kuleni nakambe. Ku tava nkombiso, eka rin’wana ra masiku lawa. Nkarhi a wu le kule laha ku nga ta ta nkombiso. Tani hilaha swa ntumbuluko... Tani hilaha Matsalwa ma nge, “Swa ntumbuluko a swi fananisa swa ximoya.” Mi ngaka mi nga swi balekeli sweswo. Hi sweswo. Swi kwala mahlweni ka matihlo ya n’wina. Swi Ntiyiso. Langutisani Kereke sweswi, ku vitanela ehandle, ku ta eka matimba. Moya lowo Kwetsima wu xikela ehansi, swihundla swa Xikwembu swi

le ku paluxiweni na ku vekiwa hi ntshamiseko. Ma vona? Nakona lahawani, se yi le ndzeni ka White House. Nakona Kereke yi le ku tikokeleni kun'we, amen, ku ngari dinominexini; ku huma evuhlongeni bya ku homboloka, ekule na Vaamori, vanhu lava va nga ntshuxeka. Oho!

¹⁵² Xikwembu a xi ri na Muxe, wa Xona loyi a fanele kuva muprofeta. Hambi leswi a kuri khale a profetile, nakona swi khorwisle leswaku a lulamile, kambe hambiswiritano a ri exikolweni xa le mananga, a tumbetiwile ekule na misava hinkwayo. Kambe a ri exikolweni, a ri karhi a leteriwa, ehandle le mananga.

¹⁵³ Valala va ta gangisa, minkarhi hinkwayo, mafambiselo ya yena. Nakona pfumala ripfumelo va ta swi pfumela, hikuva nala i xikombiso xa vutlharhi.

¹⁵⁴ Sweswi, tsundzukani, ku na mambirhi. Mi nga swi rivali leswi. Ku na matimba mambirhi ntseña. Man'we i matimba ma ximoya, ma Moya lowo Kwetsima. Lama man'wana i javulosi, loyi a tirhaka hi matimba ma swa vutlharhi. Hikuva, kwalano hi laha a nga nghena hi kona, entangeni wa Eden, hi matimba ma swa vutlharhi, ku endla leswaku Evha a pfumela eka matwisiseli ya swa vutlharhi, ku lwisana na Rito. Ntseña kuva erivaleni hilaha swi nga vaka hakona, vana va nga kota ku swi kuma sweswo. Ma vona? Ma vona? Nakona yaleyo i ndlela leyi swi ngava hakona, ndlela hinkwayo kuya ehansi.

¹⁵⁵ Hi leswi lahawani, eEgipta, mixo lowu. Ku na matimba ma swa vutlharhi lama ma tirhaka eka Ramses, ku n'wi tisa eka matimba. Na ku n'wi pfuxa, loyi a nga tiviki ntshuxeko wo pfumelela leswi Yosefa a nga swi endla, leswi kereke yi nga swi endla eku sunguleni.

¹⁵⁶ Nakona sweswi hi vona nchumu lowu fanaka, matimba ma swa vutlharhi ma le ku tshombonyokeni exikarhi ka tikereke, nakona ma pfukerile eka nhloko ya vudyondzisi leyi yi nga riki na mhaka na leswi Bibele yi nga swi vula. Va na mafambisele ma vona vinyi. A hi leswi Bibele yi nga swi vula. Hi leswi kereke yi nga swi vula. Nakona Maprotestant va tshombonyokerile endzeni ka sweswo, ku kondza swintlawana swa vona hinkwaswo, kukotisa leswi, "Kunene, i ntiyiso. Kunene, ndza swi tiva leswaku Yi vula *Leswi*, kambe ndza ku byela, masiku ma vona ma hundzile."

¹⁵⁷ "Nghohe ya vukhongeri, nakona va tsan'wa matimba." Tsalwa rin'wana na rin'wana eBibeleni ri kombetela ku kongomana na swona.

¹⁵⁸ Sweswi ma swi vona leswaku hikokwalaho ka yini ndzi lava ku kandziyisa leswi na ku swi rhumela eka vanhu. Awara yi fikile. Ntiyiso wu fanele ku tiviwa. Eksoda yi le kusuhi. Ma vona?

¹⁵⁹ Xiphemu xa—xa swa vutlharhi xi languteka xi hetisekile. Nakona xi hetisekile, hakunene-nene xi tano; kambe, ku hetiseka, huhutelo wa Sathana.

¹⁶⁰ Kutani, nkarhi hinkwawo, lowu, Ramses loyi wa swa vutlharhi a ri karhi a kula na ku ta exiluvelweni. Nakona tsundzukani, u kurile tani hi makwenu eka Muxe, ma vona, makwenu eka Muxe. Un’we wa vona a fanele ku teka xitulu xa swa vutlharhi, ntsena tani hilaha Yosefa a nga swi endla eka varikwavo va yena. Kutani xana va endlile yini hi Yosefa lontsongo? Va n’wi hlongorile ku suka eRitweni. Rito i Xikwembu. Nakona va hlongorile Rito, kutani va amukela mukhuva. Kutani sweswi mukhuva wu kurile ku ya eka matimba.

¹⁶¹ O Xikwembu, pfumelela vanhu va vona sweswo! Xana ndzi nga tirhisisa ku yini rito rin’wanyana? Xana ndzi nga swi endla njhani swi va erivaleni hi Matsalwa, ehansi ka huhutelo wa Moya lowo Kwetsima, leswaku hi kona kwala?

¹⁶² “Oho,” mi ri, “kunene, sweswi, loko sweswo swi ta swi huma eka Phophu John, kumbe Phophu *Swingere-ngere*, kumbe Bixopo *Swingere-ngere*!”

Xana ma swi vona leswaku Xikwembu xi tekile lontsongo, mutshami wa le mananga loyi a nga riki na nkoka?

Mi ri, “Swi nga endlekisa ku yini leswaku hinkwaswo ka swona swi va swi hoxekile?”

¹⁶³ Xikwembu xi tirhana na vanhu ha un’we-un’we, ku ngari hi mintlawa. Na vanhu ha un’we-un’we; Xikwembu xi ri eku kumeni ka wa Xona—Xona, eku kumeni ka wa Xona. Nchumu wun’we ntsena lowu a Xi fanele kuva na wona i wanuna un’we loyi a Xi ta tirha ha yena. Hi sweswo ntsena leswi Xi swi lavaka i wanuna un’we. Xi ringetile ku va kuma, eka nguva yin’wana na yin’wana. Loko ntsena a Xo kuma wanuna un’we! Xi kumile wanuna un’we hi masiku ya Nowa! Wanuna un’we hi masiku ya Eliya! Wanuna un’we hi masiku ya Yohana Mukhuvuri. Ntsena wanuna un’we hi loyi Xi n’wi lavaka. Hi masiku ya vaavanyisi, Xi ringetile ku kuma wanuna un’we, Samson, xi n’wi nyika matimba lamakulu, kambe u ma xaviserile wansati nakona u vile bofu. I vaavanyisi; a swi ngari tano. Xikwembu i muavanyisi. Ma vona?

¹⁶⁴ Ma swi vona, namunlhha, Xi le ku ringeten i ku kuma wanuna un’we loyi Xi nga n’wi vekaka evokweni ra Xona, loyi a nga ta vula Ntiyiso, loyi a nga taka a ngavi na vutoya hi wona, loyi a nga taka a nga kondli swibakele, loyi a nga taka a ngavi xi-oma-nhloko; wanuna un’we loyi Xi nga ta n’wi khoma hi voko ra Xona kutani xi kombisa kuva Rito ra Xona ri hanya, na ku kombisa kuva Xona n’winyi xi hanya. Ndzi pfumela leswaku Xi nga n’wi lulamissa munhu wo tani hi yaloye namunlhha. Ndza pfumela. Ndza swi pfumela. Ntsena ndzi...ku pfumela Bibele

ku ringanelu, ku pfumela leswaku Xi nga swi kuma, hi swona sweswo, loyi a nga vulaka Ntiyiso.

¹⁶⁵ Endzhaku ka nkarhi, hi kuma leswaku, endzhaku ka loko a yile eka hinkwaswo swikolo leswi. Sweswi langutisani. Nala u ringanyeta nchumu wun'wana, miehleketo ya swa vutlharhi, hikuva nala u tirha eka swa vutlharhi. Nakona miehleketo yi ta tshama ehansi kutani yi swi kanelu, kutani yi ku, "Sweswi, yimanyana. Xana a swi tano, leswaku huvo..."

¹⁶⁶ Ndzi vulavurile na wanuna siku rin'wana, nakona u te, "Langutisa, Billy!" U tirhela Public Service Company, wanuna wa kahle. Kutani a ku, "Ndzi lava ku ku vutisa swin'wana." A ku, "U mu Irish."

Ndzi ku, "Ina, nkulukumba." Ndzi ku, "Ndzi tani hi kuva na tingana ha swona, kambe, hambi swiritano, ndzi yena."

¹⁶⁷ Kutani a ku, "Kunene," a ku, "xana a wu swi tivi leswaku hakunene, kunene u fanele kuva Mukhatholiki-ke?"

¹⁶⁸ Ndzi ku, "Ndzi yena, ahaa, khatholiki ya xiviri, ahaa." Ma swi tiva, Kereke yo sungula a kuri Kereke ya khatholiki.

¹⁶⁹ Ma ku vona laha yi nga fika kona, namuntlha? Yi sungurile a Pentekosta, kambe vandla ri yi vekile laha yi nga kona sweswi. Langutisani, nakona Pentekosta yi vuyerile endzhaku kutani yi kondletela, yi endla nchumu lowu nga kereke ya Khatoliki yo sungula. Nakona va le kule namuntlha tani hilaha, tani hilaha va ngava hakona eka magidi mbirhi wa malembe. Nakona makume ntlanu wa malembe ya va tisile eka swona. Ma vona?

¹⁷⁰ U te, "Xana a wu pfumeli leswaku loko ntlawa wa miehleketo leyi kondletelaka vun'we bya tikereke," hi sweswo, "yi tshama swin'we nakona yi kanelu swin'wana, kutani ntlawa hinkwawo wu twanana, xana a wu ehleketo leswaku ntsena va ngava swintsongo... Hikuva, ndza ta ndzi ta ku twa loko u chumayela," a ku, "kambe ndzi kanetana na wena."

¹⁷¹ Ndzi ku, "Ndlela yin'we ntsena leyi u nga khorwisaka leswaku ku kaneta ka wena ka twisiseka, i ku swi khorwisa hi Bibebe."

A ku, "Bibebe a yi na nchumu xo xi endla hi swona."

¹⁷² Ndzi ku, "Eka wena, Yi ngava yi ngari tano. Kambe, eka mina, Yi hinkwaswo swo swi endla hi swona. Wa vona, hi Yona Rito."

¹⁷³ Kutani a ku, "Xana a wu ehleketo leswaku ntlawa wa miehleketo leyi kondletelaka vun'we bya tikereke leyi tshameke swin'we, yi ngava yi lulamile swinene, na kuva ni ntiyiso wa kuva yi lulamile, ku tlula un'we lontsongo, nakulorhi loyi a nga dyondzekangiki kukotisa wena?" Ndzi ku... "Kunene," a ku, "I bindzu muni leri u nga na rona ku vula xin'wana na xin'wana ku lwisana na yaleyo bi... kumbe ku lwisana na kereke ya hina—hina? Loko, ku vile na, ehansi ku rhelela hi nguva, loko va tava

na huvo ya kereke yo rhanga, tani hilaha u nga vulavula hi yona, kwalahaya vusiku byin'wana . . ." hi twile leswi, tinguva ta kereke, ta nhlengeletano ya huvo leyi kondletelaka vun'we bya tikereke eNicæa, Rhoma, na ku vumba kereke ya Rhoma ya Khatholiki. A ku, "Xana a wu swi tivi leswaku a kuri na magidi-gidi ya vavanuna, moyo, vavanuna lava rhumiweke hi Xikwembu a va tshamile eka huvo yaleyo? Nakona xana a wu swi ehleketi leswaku miehleketo ya vona yi ngava yi tshembherile swinene eku tiveni ka ku rhandza ka Xikwembu, ku tlula ya wena ehansi lahwani, endzhaku ka loko Xikwembu xi swi khorwisile eka magidi mbirhi ya malembe leswaku kereke liya yi lulamile-ke?"

¹⁷⁴ Ndzi te, "A xi se tshama xi swi khorwisa." Ndzi ku, "Loko kereke liya yi ri Kereke ya Xikwembu, a hi yi voneni yi tswala kukotisa leswi Kereke yo rhanga yi nga endlisa xiswona eku sunguleni. A hi yi voneni yi tswala swilo leswi va nga swi endla eka ndzhawu leyo rhanga. Loko, hambi yi ri Bibebe yi vula, leswaku, 'Ku hava xiyimela-vito hambi xi ri xin'we kumbe yota yi nga tsandzekaka eka Rona.' Nakona Xi te, 'Munhu wihi na wihi loyi a nga ta susa Rito rin'we eka Leri, kumbe ku engetela rito rin'we eka Rona, xiphemu xa yena xi ta susiwa,' hambi i huvo leyi kondletelaka vun'we bya tikereke kumbe hambi ku ngava yini, 'ku suka eBukwini ya Vutomi.' U herile."

A ku, "Billy, ntsena wo va loyi a nga tshembhekiki."

¹⁷⁵ Kutani ndzi ku, "Kutani, ndza tshembha, nkarhi wun'wana eka vuchaviseki bya Israel, loko va tava va avanile ku kotisa leswi Protestant na Khatholiki ti nga swi endla namuntlha, Israel a ri lava ku tshama ri ri Israel." Kambe ndzi ku, "Hi kuma leswaku a vari na hosi leyi nga thyiwa ku i Yosafat, wanuna wo lulama loyi a ringeta ku hlayisa e—e—e milawu ya Xikwembu. Kambe a vari na yin'wana lahwani leyi a yi thyiwile leswaku i Akab, leyi yi nga teka wansati, tipolotiki, ku ringeta ku kuma vanghana na tiko rin'wana, kutani yi teka un'wana wa vanhwana va vona, Yezabel, na ku n'wi nghenisa, na yena, exikarhi ka vanhu va Xikwembu." I nchumu wun'we na lowu hi nga eku wu endleni, na ku wu nghenisa. "Kutani wansati u hundzukile mufumi; a endla leswaku Akab a vula *leswi*, na ku endla leswaku Akab a vula *sweswo*." I nchumu wun'we na lowu va nga eku wu endleni sweswi. Kutani ndzi ku, "Nkombiso wa ta."

¹⁷⁶ A va lava ku hlanganisa ha vumbirhi bya tikereke kun'we, tani hilaha va nga eku ringeten i ka ku swi endla sweswi. Nakona—nakona eka Akab . . . Na hambi kuri Yoxafati, wanuna wa vandla, u te, "Ina. Sweswo swi tava swi ri kahle. Vanhu va wena i vanhu va mina. Hinkwerhu hi Vakreste. Hinkwerhu hi vapfumeri. A hi hlanganeni kun'we." Kambe loko a fika eka nkombiso, u te, "Xana a wu hleketi leswaku hi fanele ku ya hi ya khongela hi mayelana na leswi? Hi fanele ku vutisa Hosi."

Kutani a ku, "Ina," ku vula Akab.

Swingaleswi a ku, “Ndzi ta ku byela yini. A hi kumi muprofeta wa Hosi.”

¹⁷⁷ Kambe, ma swi vona, Akab a ri na mafambisele lawa a ehleketa leswaku i ma Hosi. A ku, “Ndzi na mune wa madzana ya vona, va dyondzekile na ku leteriwa.” Nakona va koxa kuva vari vaprofeta va Vaheveru, tani hi laha mintlawa ya vuchumayeri yi endlaka hakona namunthla.

¹⁷⁸ Nakona va va humeserile ehandle, na ku va vutisa xivutiso hi mayelana na—na switandzhaku swa nyimpi. Kutani hinkwavo ka vona va tile endhawini yin’we na ku hlangana, ntsena tani hilaha huvo leyi kondletelaka vun’we bya tikereke yi endlaka hakona namunthla, nakona va ta na xivutiso. “Tlhandlukani. Hosi yi na n’wina, hikuva tiko leriya hi ntiyiso i ra hina. Kutani mi susumetela Masiriya ehandle, kumbe Vafilista. Va susumeteleni ehandle, hikuva tiko i ra hina.” Sweswo swi twala swi ri leswi swi twisisekaka swinene. Ma vona?

¹⁷⁹ Kambe, hambiswiritano, ehansi embilwini ya Yoxafati, a swi nga twali swi ri kahle. U te, “Ndza swi tiva leswaku u na mune wa madzana ya vachumayeri lava va nga leteriwa kahle lava kondletelaka vun’we bya kereke lahaya. Nakona hinkwavo va hi moyo wun’we, hambi ku ri ku kondza va endla pherhe ya timhondzo ta nsimbhi na ku vula leswaku, ‘LESWI SWI VULA HI HOSI.’ Kambe xana hi nga kuma un’wanyana-ke?”

¹⁸⁰ A ku, “Hosi yi nga vuli tano,” ku vula n’wa-tipolotiki. “Hosi yi nga vuli tano, hikuva vavanuna lava i vavanuna lava va nga leteriwa. Ndzi va leterile, mina hi ndzexe.” Hi sweswo. Ma vona? Hi sweswo. “Ndzi va leterile vavanuna lava. Kambe, ka hari na un’wana, kambe ndza n’wi venga.” Ma vona? A ku, “Yaloye i Mikiya, n’wana wa Yimla, kambe,” a ku, “ndza n’wi venga. A nga nchumu ehandle kova mugwinihi exikarhi ka vona. U tshamela ku va karihela. U tshamela ku ndzi byela leswaku ndza hoxissa. Langutisa vuhosи bya mina.” Ina, byi langutiseni, langutisani leswaku i thyaka ra njhani leri a byi ri eka rona.

¹⁸¹ Langutisani dinominexini ya n’wina, namunthla, “Yi na nghohe ya vukhongeri nakona yi tsan’wa matimba ma kona.” Ma vona? Oho, mi nga hava mi ri miliyoni ku tlurisa, na gidi ku tlurisa, na vavanuna lava va nga leteriwa ku antswa, kambe xana mi le kwihi eka Moya? Xana ntamu wa n’wina wu le kwihi, a wuri eka Samson, loko a yimile lahaya, tani hilaha ndzi nga vula hakona siku rin’wana? Na hinkwaro rimba ra mmiri wa yena lowukulu lahaya, na nsiha wun’wana na wun’wana kwalahaya, kambe ku ngari na Vutomi endzeni ka wona. Moya a wu n’wi sukerile. A nga ha koti nchumu. Xihlangi lexi a xi n’wi rhangela kwalahaya; a file matihlo, hikokwalaho ka wansati un’wana. Ku fana na leswi kereke yi nga xiswona, namunthla, yi rhangeriwa hinkwako hi tipolotiki, tibixopo, vakulukumba, na hinkwato tinxaka ta swilo. Vavanuna a va koka tinhlanga, ku

kuma swin'wana eswigqokweni swa vona, na swilo hinkwaswo. Xana hi le kwihi? Swingaleswi loko hi ta eka ndhawu leyi... .

¹⁸² Varhumerile na ku kuma Yimla, kumbe e... . ku ngari Yimla; kambe Mikiya, n'wana wa Yimla. Va rhumerile na ku n'wi kuma. Nakona u profetile na ku va byela leswaku Akab u ta dlayiwa loko a nga tlhandlukela lahaya.

¹⁸³ Kutani bixopo luya nkulukumba u n'wi phakatile enon'weni. A tshembheka hi mayelana na swona. U te, "Xana Moya wa Xikwembu Wu yile kwihi loko wu suka eka mina?"

A ku, "U ta swi vona." Ahaa. Ahaa.

¹⁸⁴ A ku, "N'wi vekeni ekhotsweni. N'wi vekeni ejele ya le ndzeni. Mi n'wi phamela xinkwa xa khombo, na mati ya khombo. Kutaku loko ndzi vuya hi ku rhula," a ku, "ndzi ta tirhana na nakulorhi loyi."

¹⁸⁵ Nakona, Yimla, a swi tiva leswaku a lulamile na Xikwembu! Hikokwalaho ka yini? Xivono xa yena a xi xaxamela na Rito. A ri muprefeta. Nakona moya wa yena na xivono xa yena hakunene a swi ri na muprefeta, Eliya. U te, "Loko u nga vuya, na swintsongo, kutani Xikwembu a xi vulavulanga na mina."

¹⁸⁶ Sweswi, ndzi ku eka nakulorhi loyi, "Hi swihi leswi a swi lulamile, huvo leyi kondletelaka vun'we bya tikereke laha mune wa madzana ya vavanuna lava va nga hlawuriwa a va tshamile swin'we, lava a va hlawuriwile hi vanhu, kumbe mugwinihi un'we loyi a hlawuriwile hi Xikwembu?"

"Kunene," a ku, "kunene, xana u nga ku tiva njhani ku hambana?"

¹⁸⁷ Ndzi ku, "Endzhaku eka mpfapfarhuto wa Pulani!" Xana hi swi tiva njhani ku aka muako ehandle ka loko ku ri na mpfapfarhuto wa pulani?

¹⁸⁸ Loko a va lo yima xinkadyana, kutani va kumisisa leswaku muprefeta luya, Eliya, u rhukanile Akab, nakona a ku, "Timbyana ti ta lakatsela ngati ya yena." Nakona ti swi endlile. Xana a ta katekisa njhani leswi Xikwembu xi nga swi rhukana?

¹⁸⁹ Xana mi nga katekisa njhani nchumu wihi na wihi lowu Xikwembu xi nga wu rhukana? Humani eka nchumu wolowo. Yanani ekule na wona. Tanani eka Kreste. Amen.

¹⁹⁰ Sweswi xiyisisani. Kambe, nala u ta ringanyeta. Nala u ta kunguhata nchumu, a wu lulamisa, nakona miehleketo ya swa vutlharhi yi ri, "Sweswo hi swona."

¹⁹¹ Kwalano hi laha makwerhu loyi wo hlawuleka a ri kona. Wanuna loyi, a ku, "Swi languteka tani hi... . Langutisa lahwani. Wa swi tiva, leswaku, loko hinkwerhu ka hina hi ngava kun'we, tani hi kereke yin'we, xana a wu swi ehleketi leswaku hi ngava lava antswaka ku tlula kuva hi hangalakile hi ndlela leyi hi nga xiswona sweswi?"

¹⁹² Xana sweswo a swi twali swi ri leswi twisisekaka, loko hinkwavo Maprotestants na Makhatholiki va nga hlangana kun'we na ku fikelela mavonele yo fana? "Kambe xana vambirhi va nga fambisa ku yini ehandle kova va twananile?" Xana mi nga swi kotisa ku yini n'wina, loko ntlawa wun'we *lahawani* wu nga pfumeli eka ku horisiwa, lowu *wun'wana* wu vula leswaku va pfumela, *wun'wana* wu ku veka eka nkarhi wun'wana wa le ndzhaku? Van'wana a va kali va yi pfumela na Bibele. Kutani mi veka sweswo kun'we, xana mi na yini? Xikwembu a hi mutumbuluxi wa mpfilumpfilu.

¹⁹³ Loko Xikwembu xi nga se veka Kereke ya Xona eka ntshamiseko, va rindzerile khume ra masiku na vusiku, ku kondza hinkwavo va va "eka ndhawu yin'we, hi moyo wun'we." Hi loko ku ta Moya lowo Kwetsima eka vurhangeri, ku ngari huvo yin'wana leyi kondletelaka vun'we bya tikereke. Ma vona? Ndza tshembha leswaku ma swi kuma leswi. Xiyisisani.

¹⁹⁴ Yaloye hi loyi a nga pfumeriki, loyi a nga tshembhekiki eka Rito ra Xikwembu, loyi a nga xiyisisiki leswi Rito ri swi vulaka, kambe xiyisisani ku kanelia ka n'wina vinyi. Sweswo hi leswi Evha a nga swi endla, endzhawini leyo rhanga. U tshembherile eka ku kanelia ka yena n'winyi.

¹⁹⁵ Sathana u te, "Sweswi, langutisa lahwani. Xana a hi leswi swi twisisekaka xana? Ndza swi tiva leswaku Rito ri vula *Sweswo*. Kambe, yima nyana, xana a hi leswi swi twisisekaka leswaku—leswaku a mi tava mi antswa loko a mi tiva xo lulama eka xo hoxeka?"

"Hikokwalaho ka yini, ina." Kutani a swi teka. Wa vona? Hakunene.

¹⁹⁶ Yaleylo hi yona ndlela hi ku kanelia. Sweswi, nkala ripfumelo wu ta tshamela kuya eka ku kanelia, kambe ripfumelo a ri nge wu khumbhi.

¹⁹⁷ A swi nga tava swi ri leswi twisisekaka eka tatana wa hina; loyi a nga tatana wa ripfumelo ra hina, Abraham, loyi hi nga vana va yena ha rona "eka Kreste." A swi nga tava swi ri leswi twisisekaka leswaku wansati wa makume ntsevu-ntlhanu wa malembe hi vukhale, nakona a hanyile na yena, hi mpfhuka ka loko a hari nhwenyana, a nga tava na n'wana? Nakona loko wansati a ri na dzana ra malembe hi vukhale, kumbe makume nkaye, kutani wanuna a ri na dzana, nakona ku tama ku ngari na n'wana. A nga ta kanelia, swilo swin'wana leswikulu swa madokodela na sayense a swi nga ta nyika Sarah vukamberi? U te, "Hikokwalaho ka yini, xivelekelo xa yena xi omile. Minsisha ya masi yi omile, makume mune ya malembe lama ma nga hundza. Mbilu ya yena, eka malembe lamaya, a nga ta swi kota ku ya eku tswaleni." Hikokwalaho ka yini, kova ntsena swivangelo.

¹⁹⁸ Kambe Abraham u swi arile. “A nga dedelekanga eka xitshembhiso xa Xikwembu, hi nkala ripfumelo. Ku lwisana na swivangelo, a nga dedelekanga eka xitshembhiso xa Xikwembu, swi nga ri na mhaka leswaku a xi ri yini. Hikuva a—a hlayile Xikwembu kuva xi swi kota ku endla hinkwaswo leswi Xi nga vula leswaku Xi ta swi endla.”

¹⁹⁹ Sweswi, xana va kwihi vana va Abraham mixo lowu? N’wina vachumayeri lava va chavaka, mi chava, xinkwa xa n’wina na mati, exitarateni, loko mi sukela Babylona yaleyo. Xana ri kwihi ripfumelo ra n’wina? Davhida u te, “Ndzi tshama ndzi va lontsongo, nakona sweswi ndzi kurile. A ndzi se tshama ndzi vona lavo lulama va tshikiwile, kumbe Mbewu ya Xona yi ri karhi yi kombela xinkwa.” Mi nga chavi. Tshamani hi ntiyiso eka Kreste.

²⁰⁰ Kambe nkala ripfumelo wu ta khoma ku kanela. Sweswo hi leswi wu nga swi endla. Sweswi ma swi kuma-ke? Nkala ripfumelo wu tshembhela eka ku kanela, swilo swa siku ra sweswi. Ripfumelo a ri nge swi endli.

²⁰¹ Ripfumelo ri langutisa eRitweni. Kambe ripfumelo ri titlhandleka ehenhla ka Ribye leri ri nga fambisekiki, Rito ra Xikwembu leri nga hilaha ku nga Heriki. Amen. Ripfumelo a ri langutisi eka ku kanela. A ndzi na mhaka na leswaku mi nga kombisa njhani leswaku swi ngava leswi antswaka. Loko Rito ri ku “ee,” ripfumelo ri wisa kwallahaya. Xexo i xivandla xo kwetsima xa vuwiselo bya ripfumelo.

²⁰² Ndzi lava ku yutisa n’wina Malutheran, mixo lowu, n’wina Mabaptist, na n’wina Makhatholiki, na n’wina, hambi mi ngava mi ri yini, n’wina vanhu va xidinominexini ku rhendzeleka na misava. Xana mi nga ri veka njhani ripfumelo ehenhla ka dinominexini ya n’wina, loko yi ri karhi yi hambana na Rito? Xana i ripfumelo ra muxaka muni leri mi nga na rona? Mi na matimba yo kanela, nakona ku ngari ripfumelo. “Hikuva ripfumelo ri ta hi ku yingisa,” ku yingisa huvo leyi kondletelaka yun’we bya tikereke? Xana mi nga kala mi... Va te, mi nga kuma sweswo eka Buku ya Vakhegula ya Masiku ya ku Velekiwa, kambe mi ngaka mi nga swi kumi eRitweni ra Xikwembu.

²⁰³ “Ripfumelo ri ta hi ku yingisa, nakona ku yingisa hi Rito ra Xikwembu.” Amen. Ndzi byeleni leswaku wanuna un’wana a nga vulavula swin’wana na swin’wana swo hambana na Sweswo, nakona a vula leswaku i Rito ra Xikwembu. Loko, “Matilo na misava swi ta hundza, kambe Rito lero ri ngaka ri nga hundzi.”

²⁰⁴ Ripfumelo ri kuma Rito tani hi xivandla xo kwetsima xa rona xo wisela kona. Ri famba ri ya ehenhla ka Ribye leriya ra hilaha ku nga Heriki, Kreste Yesu, Rito, kutani ri tshama ehansi lahaya ri wisa. Tshikani mimoya yi huwelela. Tshikani mabubutsa ma ninginisa. Rona ri hlayisekile, hi masiku na masiku. Ri wisa kwallahaya eRitweni lero. Hi kona ripfumelo, ripfumelo ra xiviri

ra Xikreste, ri wisaka kona. Ndhawu ya vuwiselo i Rito, hikuva ra swi tiva leswaku Xikwembu xi tshama xi ri karhi xi khorwisa kuva Xona xi ri nkulukumba, ehenhla ka un'wana na un'wana wa valala va Xona. Swi ngari na mhaka leswaku swi languteka swi bihile ku fika kwih, na hilaha nala a nga nghena hakona, na hilaha swi langutekaka tani hi loko mi hluriwile, ripfumelo ri tama ra ha swi tiva.

²⁰⁵ Sweswi, eka n'wina vanhu lava va vabyaka, oho, hilaha ndzi nga tsakelaka ku chayela kaya leri! Loko mi khoma ripfumelo lero, leswaku mi ya eku horisiweni; xiyimo xin'wana—xin'wana na xin'wana, leswin'wana hinkwaswo, swikombiso hinkwaswo, swikombiso hinkwaswo swi nga kombetela leswaku mi le kufeni, mi ngaka mi nga fambi! Ndhawu ya vuwiselo bya rona yi le xivandleni xo kwetsima xa Rito ra Xikwembu, loko ripfumelo, ripfumelo ra xiviri ri tiveka hi roxe lahaya. Ku ngari ku pfumela ko tiendlisa sweswi; ripfumelo. Ku ngari ku langutela; kambe ripfumelo. Ku langutela ku le handle *lahawani*, ku langutela kuva kuri endzeni. Ripfumelo i khale ri ri endzeni, ri langutile ehandle, nakona ri ri, "Swi endlekile." Ma vona? Rero i ripfumelo. Kwalano hi kona laha ripfumelo ri tekaka ndhawu ya rona yo wisela kona, hikuva ra swi tiva leswaku Xikwembu xi nge pfuki, xi nge pfuki xi pfumelerile nala a khandziya ehenhla ka Xona. A xi se tshama xi swi endla. Ripfumelo ra swi tiva sweswo, swingaleswi, swi ngari na mhaka leswaku nchumu wu langutekisa ku yini.

Nowa a swi tiva leswaku ngalava liya a yi ta papamala. Ma vona? Hakunene a swi tiva.

Daniel a swi tiva leswaku Xikwembu a xi ta pfala milomo ya tinghala.

Vana va Vaheveru a va swi tiva leswaku Xikwembu a xi ta yimisa ndzilo.

²⁰⁶ Yesu a swi tiva leswaku Xikwembu a xi ta N'wi pfuxa nakambe, hikuva Rito ri te, "Ndzi ngaka ndzi nga tshiki moya wa Yena etiheleni, nakona Ndzi ngaka ndzi ka pfumeleli Mukwetsimi wa Mina a vona ku bola." A swi tiva leswaku ku bola ku sungula eka makume nkombo-mbirhi wa tiawara. U te, "Ku nga se hela masiku manharhu Ndzi ta pfuka nakambe." Ma vona? Ri tekile ndhawu ya rona yo wisela kona hilaha ku nga Heriki exivandleni xo kwetsima xa Rito ra Xikwembu, nakona a ri yimile kwalahaya.

²⁰⁷ Ku kanelo ku ta ringeta hi matimba ya kona hinkwawo ku lemuka, "Kunene, mafambisеле *lawa* ya boheka kuva yo antswa. *Leswi* hi *Sweswo*." Swi languteka swi antswa hikuva mi langutisa hi matihlo ma swa vutlharhi. Mi nga khorwisa minkanelo.

²⁰⁸ Kambe mi ngaka mi nga ri khorwisi ripfumelo. Hikuva, loko mo ri khorwisa, a ra ha ri ripfumelo. Kambe ripfumelo ri tiva

ntsena Rito na xitshembhiso, nakona ri langutisa eka nchumu luwa mi nga wu voniki. "Ripfumelo i nchumu wa swilo leswi languteriwaka, vumbhoni bya swilo leswi nga vonakiki." Mi ngaka mi nga kaneli. Ndzi ngaka ndzi khorwisi hilaha swi nga ta endliliwa hakona. A ndzi swi tivi leswaku swi ta endlisiwa ku yini. A ndzi swi tivi, kambe ndza swi pfumela. Ndza swi tiva leswaku swi tano, hikuva Xikwembu xi vule tano. Sweswo swi tshamisekile.

²⁰⁹ Xexo hi xona xivangelo xa kuva ndzi swi tiva leswaku Leswi swi lulamile. Ndza swi tiva leswaku Rito ri lulamile. Ndza swi tiva leswaku Hungu ri lulamile, hikuva Ri le Ritweni. Nakona ndzi vona Xikwembu lexi hanyaka xi ri karhi xi famba exikarhi ka Rona, ku khorwisa. Hi le ka eksoda, hakanene i ntiyiso.

²¹⁰ Hambi kuri rifu hi roxe ri ngaka ri nga ri ninginisi ripfumelo. Vanhu va yima ntsena eka rifu, eka . . . kwale xikandzeni xa rifu, kutani va huwelela ku hlula ka ku pfuxiwa. Paul, "O rifu, xana ndzhombho wa wena wu kwihi? Sirha, xana ku hlula ka wena ku kwihi?" Ma vona? "Hikuva, Kreste u pfukile, nakona lavaya va nga eka Kreste va ta humelela na Yena eku Vuyeni ka Yena." Ma vona? Mi ngaka mi nga swi cinci. Ina.

²¹¹ Ripfumelo ri endla Rito ra Xikwembu e xivandla xo kwetsima xa rona xa vuwiselobya hilaha ku nga Heriki. Ri tshama eRitweni ra Xikwembu. Xiyisisani, nakambe.

²¹² Sweswi, ntsena hi lehisile nyana, kwalomu ka makume mbirhi-ntlhanu wa timinetse, loko mi-loko mi nga vileli. [Nhlengeletano yi ku, "Amen."—Muhleri.] Ndzi—ndzi lava ku yisa thepi leyi emahlweni, ntsena xinkadyana.

²¹³ Xiyisisani hosi, hosi liya yintshwa leyi yi nga pfuka, leyi yi nga n'wi tivangiki Yosefa. Xana kungu ra yena ro rhanga a kuri yini, ku herisa matimba ma Israel? A kuri hi vana va vona. Hi swona sweswo? [Nhlengeletano yi ku, "Amen."—Muhleri.] U ringetile ku herisa vana va vona. Sweswi yingisani hi vukheta. Javulosi loyi a fanaka, hi xivumbeko xo hambana xa vuhosu, u ringetile ku herisa N'wana un'we ntsena wa Xikwembu. Ma vona? "Herisa vana, ku sungula, loko va nga se kuma masungulo." Javulosi hi lexo tlhariha swinene, xinyenyani xa mano. Wa swi tiva ku ba nchumu loko wu nga se sungula. Wa swi tiva. Ma vona?

²¹⁴ Nakona nchumu wun'we ntsena lowu mi nga wu endlaka, ku n'wi ba, i ku tshembhela eka Kreste, na ku titsongahata na ku N'wi pfumelela a mi rhangela. Ma vona? Mi nge pfuki mi swi endlile hi ndlela yin'wanyana. Matimba ma vutlharchi bya n'wina ma ngaka ma nga swi koti. Mi fanele ku swi pfumela. Ntsena tshembhelani eka Yena. Hi yena Murisi. A hi ntirho wa tinyimpfu ku sivela mahlolwa ekule. I ntirho wa murisi. Kambe tinyimpfu ti fanele ku tshama na murisi, leswaku ti tshama ti hlayisekile.

Xexo i xivandla xa mina xa vuhlayiseki, hi le ka Kreste; nakona Kreste i Rito. Xexo i xivandla xa vuhlayiseki.

²¹⁵ Xiyisisani. Javulosi, hi xivumbeko xa—xa Ramses, hosi, nchumu wo rhanga lowu a nga wu endla a kuri ku herisa vana, hi rifu ra ntumbuluko. Nakona kute loko N'wana wa Xikwembu a ha ku tswariwa... U sukile e Egipta, hikuva Xikwembu xi herisile Egipta, xi yi rhukana. A xa ha tlhelelanga endzhaku, hi mpfhuka ka sweswo. Kutani a ri eRhoma; Sathana u yisile xitulu xa yena—yena ehenhla eRhoma. Nakona nchumu wo rhanga lowu Rhoma yi nga wu endla, ku herisa hinkwaswo ka swona, ku kuma, kuva ni ntiyiso; javulosi, eka mafambisele lawaya ya Xirhoma, u ringetile ku herisa (yini?) N'wana wa Xikwembu, ku sungula. Javulosi loyi a fanaka!

²¹⁶ Nakona, namuntlha, u endlile nchumu lowu fanaka, ehansi ka xikombiso xa moyo sweswi, ya vukhongeri, ku hlambanya Vukreste, na ku teka vanhwenyana va hina na ku va tekanisa na vafana va Khatholiki, na ku va endla va tswala vana va vona eka Khatholiki, ku tshova matimba ma tlhelo lerin'wana. Hi leriya dimoni ra n'wina. Hi leriya dimoni ra n'wina ri tshameke eswigangeni swa nkombo, ri ambarile tiharhi tinharhu, ntsena kuva na vuxisi na mano, wo tlhariha, wa swa vutlharchi kukotisa nyoka; mbewu ya nyoka, vana va yena, va ri karhi va tirhisa tindlela leti ti fanaka ta swa vutlharchi. Langutisani.

²¹⁷ Kutani va dlaya vana, eka minkarhi leyin'wana yimbirhi. Va dlaya vana hi yini? Minkarhi yimbirhi. Sweswi tsundzukani, langutisani yaleyo mbirhi, na liya nharhu. Ma vona? U dlayile vana, minkarhi yi mbirhi leyo sungula, hi rifu ra ntumbuluko. Nakona nkarhi lowu wo hetelela, u le ku kumeni ka vana na ku va dlaya hi rifu ra ximoya, ku tekana, ku tekana hi ku hlanganana.

²¹⁸ Xana Daniel a nga vulanga nchumu wun'we, eka mfumo lowu wa nsimbhi na vumba, leswaku va ta hlanganisa timbewu, ku ringeta ku tshova matimba ma vanhu lavan'wana? Nakona sweswo hi leswi va nga eku swi endleni, ku kondza va kuma nchumu wa kona sweswi. Va nghenisile presidente. Sweswi, nchumu lowu landzelaka lowu mi faneleke ku wu endla, i ku veka—i ku veka mukhadinali endleni. Mi veka khabinete hinkwayo endleni, nakona xana mi ya eku endleni ka yini?

²¹⁹ Nchumu lowu landzelaka lowu va wu endlaka, va teka mali ya vona kutani—kutani va hakela xikweleti xa United States, kutani va yi lomba eka kereke, kutani mi tava mi xavisiwile. Ina. Sweswi, hi le ku—hi le ku hanyeni namuntlha, ku hakela swikweleti swa hina swa matiko mambe lahaya, hi mali ya xibalo leyi yi nga taka yi nga hakeriwi ku kondza ku hundza makume mune wa malembe. A ha hari na mali yin'wana. Kambe kereke yi na yona. Xana Bibele a yi swi vuli leswaku, “Wansati a bombile hi nsuku”? Nakona, oho, mina! Kambe n'wina... .

²²⁰ Yaleyo i ndlela leyi swi endlaka ha yona, ma vona, ku tekanisa vanhwana va n'wina, vanhwana va tekana na majaha ma n'wina, swi kurisa vana va n'wina hi Xikhatholiki, hakunene-nene, swi va dlaya hi rifu ra ximoya. Xana Bibebe a yi swi vulanga, leswaku, "Xi ta n'wi hoxa emubedweni wa swa misava, na ku dlaya vana va yena hi rifu ra ximoya"? Nhlavutelo 17. Ma vona?

²²¹ Minkarhi hinkwayo i Rito. A ndzi na mhaka leswaku u ya kwihi, ku tama ka hari Rito. Swi fanele ku ringana eka xifaniso. Loko swi nga ringani, a hi Rito, a hi Rito. Ungaka u nga swi endli swi famba ndlela hinkwayo hi Bibebe, kutani swi hoxekile.

²²² Langutisani. Hi nkarhi lowu, Xikwembu a xi ri karhi xi letela nandza wa Xona eka ntirho wa yena. Ku n'wi letela, ehandle ka matihlo ya vona, ehandle ka makungu ma vona, marhengu ma vona. Xana mi le ku swi khomeni? Ehandle ka mafambisele ma vona ma mavandla, Xikwembu a xi ri karhi xi letela wanuna eka xikongomelo xa Xona. Ntsena xo swi pfumelela swi ya emahlweni. Ku n'wi pfumelela a teka, na kuva na nsati wa yena na vana, Gerxom n'wana. A hanya vutomi bya kahle, xi ri karhi xi n'wi katekisa kwalahaya. Kambe, nkarhi hinkwawo, a Xi ri karhi xi n'wi lulamisa, xi n'wi letela.

²²³ Xikwembu na nala wa Xona va swi endlile, eka ntumbuluko nkarhi luwa, ntsena tani hilaha Xikwembu na nala wa Xona va nga eku swi endleni eximoyeni sweswi. Va va dlayile hi rifu ra ntumbuluko; sweswi hi rifu ra ximoya. Ma vona? Xikwembu a xi ri eku lulamiseni ka wanuna wa ntumbuluko, muprefeta wa Xona, ku rhelela eEgipta. Nakona Sathana a ri karhi a lulamisa Ramses, wanuna wa yena wa ntumbuluko, ma vona, ku lulamisa wanuna wa ntumbuluko (yini?) ku va a dlaya, kumbe ku hlanganisa Vaegipta hinkwavo na Vaheveru kun'we, ku endla leswaku va tama va ha va tirhela.

²²⁴ Hikokwalaho swi nonohaka kuva miehleketo yi kanelia ku lwisana na mafambisele ya dyondzo leyi yi nga khorwisaka timhaka ta yona. Ma vona? Hi swona sweswo. Miehleketo ya vona yi ta tshama yi ri karhi yi ya eka dyondzo. Swa vutlharhi na miehleketo yo kanelia a swi Swi voni.

²²⁵ Xana mi yi vonile *Milawu ya Khume* ya Cecil Demille? Ndza tshembha leswaku vo tala va n'wina mi yi vonile. A ndzi pfumeli eka ku ya eka minkombiso ya swifaniso, hinkwaswo swilo leswi. Kambe ndza bumabumela eka kereke, leswaku mani na mani, loko va nga vanga na nchumu ehandle ka sweswo, lava a va lava ku yi vona, a swi tava kahle loko va lava ku yi vona, hikuva, a ndzi nga ta pfumelela...Xo rhanga, van'wana va vamakwerhu va mina va yile. Va ta, va ta ndzi byela. A ndzi seva ekusuhi na yin'wana eka malembe yo hlaya. Eku heteleleni, ndzi rhelerile kwalahaya, loko yi ri laha ku voniwaka mi nga humanga emovheni. Ndzi yi langutile. Ndzi swi vonile leswi a yi

ri xiswona. Kutani ndzi byerile kereke leswaku, “Loko mi lava ku ya mi ya vona sweswo, swi lulamile.” A yi ri kwalahaya. A yi rhandezka, yi sasekile.

²²⁶ Hilaha mano lawaya ya javulosi, hilaha a xisa hakona lahaya, hilaha a—a ngheneka hakona lahaya ku ya dlaya vana lavaya. Na hilaha miehleketo ya swa vutlharhi yi nga swi kuma hakona na ku swi pfumela, hikuva a va swi vona! A swi ri leswi twisisekaka. Oho, hilaha Xikwembu a xi ri hakona, nkarhi hinkwawo, eku leteleni ka muprefeta loyi! Na hilaha Egipta a ri ri karhi ri letela, hi tipolotiki, Ramses loyi, kuva a ta fuma! Kutani mphikizano lowukulu wu tile, siku rin’wana, exikarhi ka swa vutlharhi na matimba ya ximoya. Nakona Ramses, na hinkwaswo swa swikwembu swa yena, a yimile ehandle lahaya na ku chululela mati endzeni, ku—ku katekisa xikwembu xa Nile. Xikwembu xi n’wi bile, nakona ngati yi halakile yi huma eka yena. A ri na . . . Oho, a ndzi—ndzi ehleketa leswaku a swi hlamarisa, ma vona, ku vona leswi swi nga humelela. Oho!

²²⁷ Sweswi langutisani. Va vutlharhi va ta tshama va ri karhi va ya eka ku kanelia. Nakona swi ngaka swi nga ri voni tlhelo ra ximoya, hikuva i swa vutlharhi. Oho, na hambi kuri nkarhi wun’wana! Va ngaka va nga swi voni sweswi.

²²⁸ A va nga ta swi vona hi masiku ya Eliya. Xana loyi un’we muprefeta wo khalabya wa xikandza xo tlhuma . . .

Xikwembu xi ndzi khomela kuva ndzi vula nchumu wo tani hi wolowo. Kambe ndzi—ndzi hupa ku endla . . . Nakona Xikwembu xa swi tiva leswaku ndzi le ku ringetenka ka ku swi endla—endla swi hlekisa hilaha ndzi nga kotaka hakona, leswaku mi ta kota ku vona e—e Moya wa Xikwembu.

²²⁹ Kukotisa loko Paul a te, “A ndzi kali ndzi ta eka n’wina, ndzi ri karhi ndzi vulavula hi marito yo koka rinoko na vutlharhi, hikuva miehleketo ya n’wina yi nga ha khukhuleriwa eka vutlharhi. Kambe ndzi ta hi matimba ya Moya lowo Kwetsima, leswaku ka n’wina—leswaku ka n’wina—ka n’wina—ka n’wina ku langutela na ku tshembha ku nga ta wisa, ku ngari eka vutlharhi bya munhu, kambe eka matimba lama ma pfuxaka ma Yesu Kreste.”

²³⁰ Hikokwalaho ndzi ri eku endleni ka leswi kuva swi hlekisa swonghasi, hi ku vitana lonkulu, muprefeta wa vukwembu, “wa xikandza xo tlhuma.” Hikuva, a ngava a vile e—e nchumu lowu langutekaka wu chavisa, ku yima, etlhelo ka muprista wo ambala kahle, kutani a tititana wanuna wa Xikwembu.

²³¹ N’wi langutiseni. Mi nga vona vukwetsimi bya muprista luya, eka miehleketo ya swa vutlharhi. A mi ta vona duku enhlokweni ya yena, na leyi yi hundzuluxiweke . . . na efod yi tshamile exifuveni xa yena *lahawani*. A mi ta vona mafurha ya ntoto, ya ntumbuluko, ehenhla ka malevhya ya yena, ya ri karhi ya khulukela eka nsomo wa xikete xa yena. A mi ta vona mindzilo

ya gandzelo, na hinkwayo mihivahivani eka ntshamiseko. Sweswi, sweswo hi leswi miehleketo ya ntumbuluko a yi tava yi yile eka swona.

²³² Sweswo hi leswi va nga eku ringeten i ka ku swi endla namunthla, tihlo, nyangwa wo ya eka munhu wa le ndzeni. Kambe, ma swi vona, tihlo ra ximoya endzhaku ka tihlo lero!

²³³ Va langutisile mukhalabya loyi wo languteka a tlhumile loyi a yimile lahaya, mavoya exifufeni xa yena; na lexikulu, xiphemu xa dzovo ra nyimpfu xi phutseriwe emirini wa yena, ra dzovo, xifunga exisutini xa yena, na, kumbexana a nga ambalanga emilengeni, swivokwana swa khale swo lala, nyama yi lenga-lengela ehansi hi ndlela *leyi*; na mo basa, malevhu lama ma khulukelaka exikandzeni xa yena hinkwaxo; na nhonga yo gombonyoka evokweni ra yena, a yimile kwalahaya. Kambe tihlo ra ximoya a ri ta vona matimba ma Xikwembu ma ri karhi ma famba-famba ehandle lahaya, hikuva hakunene a ri ri na Rito. Ku ngari leswi vutlharhi byi swi vonaka; leswi tihlo ra ximoya ri swi vonaka!

²³⁴ Nakona tihlo ra—ra ntumbuluko, namuntlha, ri vona kereke leyi kokaka rinoko, xinakulobye na meyara wa doroba, kumbe—kumbe swihi swin'wana, eka vandla leri ra tidinominexini. Nakona va tsandzeka ku vona matimba ma Moya lowo Kwetsima, loko Wu kota ku pfuxa vafi na ku horisa vavabyi. Na—na—na hilaha... Ma vona? Va, va langutisa, nakona va langutisa Hollywood, nakona va langutisa vanhu exitarateni.

²³⁵ Vavasati, namuntlha, va ehleketa leswaku, “Kunene, wansati *loyi*, Susie, u wela ekerekene. U bobile misisi ya yena. U tola timekapu. Munhu un'wana na un'wana edorobeni wa n'wi tsakela.”

²³⁶ Ndza tivutisa hi mayelana na Tilo? Ma vona? Loko swi hambana na Rito, Xikwembu xi ngaka xi nga swi pasisi. Xona, Xi ngava xi ri karhi xi pasisa ku lwisana na Xona hi xoxe. Xi tava xi ri karhi xi tsan'wa Rito ra Xona N'winyi. Nakona a swi tiveke, Xikwembu xi nge pfuki xi endlile sweswo, hambi loko matilo na misava swi hundza. Wansati wa misisi leyi bobeweke i ndzhukano, ematihlwani ya Xikwembu, kumbe wansati loyi a nga ta ambala nguvu leyi yelanaka na ya wanuna. Ma vona? Tihlo ra ximoya ra Swi khoma; ma hanyela ku sukela sweswi kuya Emahlwani. Miehleketo ya ntumbuluko yi hanyela ku kanelia swilo swa xinyama swa siku lero.

²³⁷ Xiyisisani sweswi, Xikwembu a xi endlile leswi, nakona hambiswiritano vanhu a va swi tivanga. Miehleketo ya xinyama a yi ri karhi yi famba na ku kanelia. Xikwembu sweswi xi le ku vitaneni ka eksoda ya ximoya. Laha Xi nga vitana eksoda ya ntumbuluko eka vanhu va Xona, Xi le ku vitaneni ka eksoda ya ximoya namuntlha, eka (Yini va xona?) Vahlawuriwa va Xona, ntsena eka Vahlawuriwa va Xona.

²³⁸ Sweswi, Egipta a ri ngata vona Israel ri ri leri nga lulama, hambi leswi ngati ya xinyimpfana a yi ri enyangweni na le rimbeni ra phuphu, na swilo leswi a swi ri karhi swi teka ndzhawu.

²³⁹ Nakona Xikwembu ehansi lahaya, xi ri karhi xi famba-famba eka muprofeta loyi, na ku teka rito ra wanuna. Xi n'wi pfumelela a yima ehenhla lahaya, nakona a teka e—e nhonga ley i a tiseketerile hi yona, kutani a fikelela ku kongoma evuxeni, kutani a ku, “A ku te tinhongani, nakona ti hungela ehenhla ka Maegipta.” A famba endzhaku lahaya.

Nakona vanhu hinkwavo va te, “A ku humelelanga nchumu. A ku humelelanga nchumu.”

²⁴⁰ Kambe ntsena hi xinkadyana, nhongani ya khale ya rihlaza yi tava yi sungurile ku rhendzeleka kwalahaya. Endzhaku ka nkarhi, kumbexani a ti ri tipondzo timbirhi hi xikwerek xa jarata, leti wanuna a nga vulavula vutumbuluxi byi va kona.

²⁴¹ A kuri na Ramses wa swa vutlharhi loyi a yimile lahaya, loyi a lwisana; wanuna wa vukhongeri swinene, nakona a lwisana na Moya wa Xikwembu. Nakona miehleketo ya ntumbuluko a yi ta vona Ramses ntsena. Kambe miehleketo ya ximoya yi vonile xitshembhiso, na ku xi vona xi ri karhi xi humelela.

²⁴² Kunene, loko Yoxuwa na Kaleb va kotile ku vitana Vaamaleke lavaya, na Vahevi, na Yebus, tani hi loko va ngari kona lahaya, hambi leswi a vari hi kambirhi, kumbe kanharhu kumbe kamune hi sayizi ya vona. Kutani miehleketo ya ntumbuluko, eKadesh-barnea, loko tinhlorhi ti yile kona, ti te, “Ahaa, hi ngaka hi nga swi koti. Hi... Va—va tele ngopfu. Kunene, hina hi kotisa—hina hi kotisa tinjiya, etlhelo ka vona.”

²⁴³ Kambe Kaleb na Yoxuwa va vonile xitshembhiso xa Xikwembu, va ku, “Hi kota ku swi endla hi ku tlurisa.” Hikokwalaho ka yini? A va langutisile, “Xikwembu xi te, ‘Ndzi mi nyika tiko.’” Ma vona? Miehleketo ya xinyama a yi swi kumi. Miehleketo ya ximoya ya swi kuma.

²⁴⁴ Nakona hikokwalaho ka yini? Ndzi lava ku mi vutisa swin’wana. Hikokwalaho ka yini Vaegipta va nga swi vonanga swilo leswi? Hikuva a va nga hlawuriwanga. Xikwembu xi byerile Abraham loko swi nga se humelela. Swi kumeni, n’wina kereke ley i nga etlela! Xikwembu xi byerile Abraham loko swi nga se humelela, “Mbewu ya wena yi ta tsendzeleka e—eEgipta, ku ringana mune wa madzana ya malembe, nakona ndzi ta va humesa.” Xexo hi xona xivangelo xa kuva va swi vonile, hikuva a va hlawuleriwe kuva va swi vona. Hi vona nhlawulo. Israel a ri hlawuleriwe kuva ri vona xikombiso xa Xikwembu, nakona va humile eEgipta laha lava va nga pfumeriki va loveke kona.

²⁴⁵ Kutani, namuntlha, Xikwembu xi le ku vitaneni ka Muhlawuriwa wa Xona, Mbewu ya ximoya ya Abraham, hi ripfumelo leri a ri na rona eRitweni ra Xikwembu. Xana

a mi yi voni Mbewu ya ximoya, namuntlha? [Nhlengeletano yi ku, “Amen.”—Muhleri.] Yaleyi a yi voni kereke ya swa vutlharhi. Yi vona Rito. Nakona Yi le ku vitaniweni ku suka eka tidinominexini letiya tikulukumba, ku ya eVukoneni bya Yesu Kreste. Amen. Xana sweswo a swi twisiseka? Xana mi swi kumile? [“Amen.”] Swi lulamile. Hi ta ya emahlweni. Vahlawuriwa, ntsena!

Dokodela D.L.Ph., a va kali va Swi vona. A va nga hlawuriwanga.

²⁴⁶ Nakona, tsundzukani, nhlawulo lowu, wu le kuteni sweswi, ntsena a wu le ku yeni eka tiko rin'wana, wu le ku yeni eVukwetsimelweni, laha mavito ya vona ya nga tsariwa eBukwini ya Xinyimpfana ya Vutomi. Ku ngari ehansi ka xa ntumbuluko, xinyimpfana xa xiharhi lexi xi nga humesela Israel ehandle, leswaku va ta wa ku suka kona na ku tlhelela endzhaku. Kambe, leswi swi ngaka swi nga tsandzeki. Leswi swi le hansi ka Ngati ya Xinyimpfana xa Xikwembu lexi xi nga thaviwa ku nga se va na masungulo ya misava. Nakona mavito ya vona a ya vekiwile eBukwini ya Xinyimpfana ya Vutomi ku nga se va na masungulo ya misava. Nakona va kwalahaya, vahlawuriwa. Kutani loko Rivoningo leriyi ri hatima ehenhla ka vona, ku kotisa sweswo, makhumbi ma xidinominexini ma wela ekule na vona, nakona hi lava va taka. “Humani exikarhi ka vona,” ku vurile Moya lowo Kwetsima eka masiku lama mo hetelela. “Mi nga khumbhi swilo swa vona leswi nga basangiki. Ndzi tava Xikwembu eka n'wina; n'wina mi tava majaha na vanhwana eka Mina.” Sweswi, langutisani.

²⁴⁷ Israel a ri langutisile. A va swi tiva leswaku Xikwembu a xi tirhana na vaprofeta va Xona. Va . . . Rito ri ta eka vona, nakona va tela ku Ri vona. Nakona va Ri vonile.

²⁴⁸ Kutani sweswi xikombiso xa vutlharhi bya vona, ha xi vona sweswi, lexi va xi pfumelaka eka mavandla ma vona. Va ha ri eka mikhuva ya vona. Hambi leswi va . . .

²⁴⁹ Ntsena tani hilaha Balaam a ri xiswona, loyi a nga ya ehenhla ka xiganga, laha Israel a ri ri kona. Kwalahaya a kuri na Israel, ku ngari rixaka, a ro va ntsena vanhu lava va papamalaka kwalahaya, nakona a vari na nandzu. Nakona Moab, makwenu wa yena, wa vutlharhi, wanuna loyi a tikondleterile, u yile ehenhla ka xiganga, na bixopo kumbe muprofeta loyi a vari na yena, kutani va simeka altari, na ku humesa xitlhavelo lexi fanaka. Kambe u tsandzekile ku vona Langavi ra Ndzilo na Ribye leri ri biweke exikarhi ka Israel.

²⁵⁰ Swingaleswi swi tano na namuntlha. Miehleketo ya swa vutlharhi a yi langutisile eka munhu wa ndhuma loyi a yimile kwalahaya. Va tsandzekwa ku vona Ribye leri ri biweke. Hambi kuri bixopo, hi yexe, u tsandzekwa ku vona matimba ma Moya

lowo Kwetsima, ku huwelela ka Hosi emuxaxeni. Va tsandzeka ku ku vona.

²⁵¹ Swingaleswi, yaleyo i ndlela leyi swi nga xiswona nakambe namunthha. Xikwembu xi le ku vitaneni ka vanhu va Xona lava nga hlawuriwa, nakona va hlawuriwile sweswi. Nakona sweswi va hlawuriwile hikokwalaho ka yini? Hikokwalaho ka ku pfuxiwa. Nakona i xikombiso xa muxaka muni lexi Xi nga eku va kombetenka xona? Xikombiso xa ku Pfuxiwa.

²⁵² Xana a Xi va komba yini nkarhi luwa? Xikombiso xa ku ntshuxa, ku va ntshuxa ku suka evuhlongeni, xikombiso xa matimba lama ma nga pfalaka matilo kumbe ma nga ntimisaka xibakabaka.

²⁵³ Kutani sweswi Xi le ku kombiseni ka matimba ma ku pfuxiwa ka N'wana wa Xona loyi a hanyaka exikarhi ka vona, ku va pfuxa ku huma esirheni na swilahlo leswi hi nga eka swona, ku ya eTikweni leri Xi nga ri tshembhisa eka hina. Xikombiso xa ku pfuxiwa, ku vitanela ehandle ka Egipta ra ximoya na Babilona ra ximoya, hi ku tiva.

²⁵⁴ Mi nge ndzi vulela leswi ehansi sweswi, leswaku mi ta swi kuma. Ku swi endla hi mafambisele man'we lama Xi nga ma endla eku sunguleni, nchumu wun'we lowu Xi nga eku wu endleni. Ku pfala matihlo ma lava va nga pfumeriki; ku pfula matihlo ya mupfumeri. Nakona xiyisisani tipolotiki ti le ku swi endleni hi tlheloa ra swa vutlharhi, tipolotiki na kereke, tipolotiki na matiko, swilo hinkwaswo; nakona tlheloa lerin'wana ri tumbetiwile ekule na swona, xivangelo xa ximoya.

²⁵⁵ Xikwembu xi tekile wanuna un'we emananga, xi n'wi letela. Kutani xi n'wi tlherisela endzhaku, na ku yisa nchumu kwalahaya, na ku humesela vanhu ehandle. Ma swi vona leswi ndzi swi vulaka? Xi ngaka xi nga cinci nonganoko wa Xona. Hi xona Xikwembu. Xi nge pfuki xi tirhanile na ntlawa. A xi se tshama xi swi endla. Xi tirhana na vanhu ha un'we-unwe; nakona Xi swi endlile, nakona Xi ta swi endla. Nakona Xi tshembhisile, hambi kuri eka Malakiya 4, Xi ta swi endla. Hi swona sweswo. Swingaleswi hi lexiya xitshembhiso xa Xona, leswi a Xi ri xiswona; xi tshembhisile leswi Xi nga vula leswaku Xi ta swi endla, nakona hi hina lava. I vanhu va njhani, vo tsaka, hi fanele ku va vona; hi ri karhi hi va nyika xikombiso, hi xikombiso xa Rito ra Xona leri ri nga tshembhisiwa, Rito leri ri nga tshembhisiwa. Xi tshembhisile leswaku Xi ta swi endla. Nakona va... "Ku ta tlherisela Ripfumelo ra vanhu, timbilta vanhu, endzhaku eka Ripfumelo ra vatatana va xipentekosta va xiviri." Xi tshembhisile ku swi endla, ku kombisa swikombiso swa Xona.

²⁵⁶ "Kukotisa hilaha a swi ri hakona hi masiku ya Sodoma, swi tava tano eku Vuyeni ka N'wana wa munhu." Xana i xikombiso xa muxaka muni lexi tikereke ti nga xi vona eSodoma? Xana

kereke ya swa vutlhарhi yi vonile yini? Vachumayeri vambirhi. Xana Kereke ya ximoya, vahlawuriwa, Abraham na ntlawa wa yena? Yi vonile Xikwembu xi vonakarisiwile emirini wa nyama, wa nyama ya munhu, lowu a wu kota ku vonisisa moya na ku vula leswi Sarah a ri karhi a swi vula endzhaku ka yena. “Kukotisa hilaha a swi ri hakona hi masiku ya Lot, swi tava tano eku Vuyeni ka N’wana wa munhu.” Hi vona Moya lowo Kwetsima exikarhi ka hina, wu ri karhi wu endla nchumu lowu fanaka, wu ri karhi wu tirha enyameni ya munhu. I awara ya kona. Ma vona? Hi kona kwala, vanghana. Hi sweswo ntsena. Eksoda yi sungurile.

²⁵⁷ Kambe xiyisisani sweswi, Xi swi endlile nkarhi luwa hi yini? Xiyisisani, nakona mi ambala maehleketelele ya n’wina ya ximoya. Ingaku Moya lowo Kwetsima wu nga veka endzhaku kepisi liya ya khale ya ku hambana sweswi, kutani mi langutisela ekusuhi. Xikwembu loko xi kala xi endla xiboho xo endla xin’wana na xin’wana, hi ndlela yin’we, Xi nge pfuki xi yi cincile.

²⁵⁸ Entangeni wa Eden, loko Xi lavile ku kutsula munhu a tlhelela eka xinakulobye, Xi endlile xiboho: a kuri ngati. Va ringetile dyondzo, va ringetile dinominexini, va ringetile ku endla leswi swi fumiwa hi tiko, na swilo leswin’wana hinkwaswo, nakona a swi tirhi. Ku na ndhawu yin’we ntsena leyi Xikwembu xi nga ta tshama xi ri karhi xi hlangana na munhu kona, kwalano hi le hansi ka ngati leyi halatiweke, tani hilaha a swi ri hakona eEden. A swi se tshama swi cincea. Ndhawu yin’we ntsena leyi Xikwembu a xi hlangana kona, hi masiku ya Yobo, a kuri ehansi ka Xinyimpfana xa xitlhavelo. Ndhawu yin’we ntsena laha a Xi hlangana kona hi masiku ya Israel, ehansi ka xinyimpfana xa xithlavelo; kukotisa hilaha Xi nga endla hakona entangeni wa eEden, ehansi ka xinyimpfana xa xitlhavelo.

²⁵⁹ Ndhawu yin’we ntsena leyi Xi hlanganaka kona namuntlha, a hi le ka tidinominexini; ta holova na ku kwetlembetana exikarhi ka yin’wana eka yin’wana. Ku ngari eka xikereke; ta ha endla nchumu wun’we. Ku ngari eka tintlhari; ti va ti hlangananile hinkwako. Kambe ehansi ka Ngati ya Xinyimpfana, mupfumeri un’wana na un’wana a nga ha hlangana na xinakulobye, laha Vutomi byi nga kona.

²⁶⁰ Xikwembu xi hlawurile, hi masiku ya eksoda, Xi vitanerile ntlawa ehandle. Nakona ku suka eka ntlawa wolowo, ndzi lava leswaku mi xiyisia swin’wana, Xi kumile vambirhi ntsena lava va ngaya etikweni leri nga tshembhiswa. Xana Xi hlawurile ku va humesa hi yini, tipolotiki, vandla? Xi hlawurile muprefeta, hi xikombiso xa le henhla ka ntumbuluko xa Langavi ra Ndzilo, leswaku vanhu va taka va nga hoxisi. Leswi muprefeta a swi vula a kuri Ntiyiso. Nakona Xikwembu xi xikerile ehansi, Langavi ra Ndzilo, kutani xi tikombisa Hi Xoxe, xi kombisa Rito ra Xona. Hi swona sweswo? [Nhlengeletano yi ku, “Amen.”—Muhleri.]

Sweswo hi leswi Xi nga swi tisa, eksoda ya Xona yo rhanga. Eksoda ya Xona ya vumbirhi . . .

²⁶¹ Xikwembu minkarhi hinkwayo xi famba eka vunharhu. Xi hetisekile hi vunharhu. Hinkwenu ma yi xiysisa minchumayelo ya mina, minkarhi hinkwayo yi hi vunharhu na vunkombo. Ahaa. *Nkombo i* “ku hetisela.” *Nharhu i* “ku hetiseka” ka xona. Ko rhanga, ka Vumbirhi, na ku Koka ka Vunharhu. Nakona, oho, hinkwaswo, swilo hinkwaswo. Ma vona? Ku lulamisiwa, ku basisiwa, nkhuvulo wa Moya lowo Kwetsima. Tatana, N’wana, Moya lowo Kwetsima. Swilo hinkwaswo! Ma vona? Xiyisisani.

²⁶² Xana Xi endlile yini, eksoda yo rhanga? Xi rhumerile muprofeta, loyi a totiwile hi Langavi ra Ndzilo, nakona Xi vitanerile vanhu va Xona ehandle. Yaleylo a kuri eksoda yo rhanga ya Xona.

²⁶³ Kute loko nkarhi wa Israel wu herile, Xi rhumerile nakambe, Xikwembu-Muprofeta, na Langavi ra Ndzilo. Yohana u Ri vonile ri ri karhi ri xika hi le Tilweni kukotisa tuva. Nakona U te, “Ndzi ya eka Tatana nakona Ndzi tlhelela eka Tatana.”

²⁶⁴ Endzhaku ka rifu ra Yena, ku lahliwa na ku pfuxiwa; Saul wa Tarso, endleleni ya yena ku rhelela eDamasca, u vonile Langavi ra Ndzilo leriya ri fanaka. Nakona kuva yena a ri Muheveru, a dyondzisiwile swinene hi Rito, u te, “Hosi, U Mani xana?” A swi tiva leswaku a kuri Hosi, Langavi lero ra Ndzilo. A ri Muheveru. A ku, “U Mani xana?”

Kutani Yena a ku, “Hi mina Yesu.”

²⁶⁵ Eksoda ya vumbirhi, Xi tisile Muprofeta, loyi a totiweke, loyi a ri N’wana wa Xona, Xikwembu-Muprofeta. Muxe u virile leswaku U tava a ri Muprofeta; nakona a ri na Langavi ra Ndzilo, nakona u endlile swikombiso na masingita. Nakona Muprofeta loyi a fanaka u virile, leswaku, “Mani na mani loyi a pfumelaka eka Mina, mintirho leyi Ndzi yi endlaka u ta yi endla na yena.”

²⁶⁶ Nakona lahawani Xi tshembhisile nchumu lowu fanaka eka eksoda hi masiku yo hetelela, nakona Xi ngaka xi nga swi cinci. Nakona hi ku khorwisa ka xisayense, hi mbhoni ya Moya lowo Kwetsima, hi mintirho ya Moya, ha swi vona namuntlha, Langavi ra Ndzilo lerikulu ri ri karhi ri famba-famba exikarhi ka hina; na Swikombiso na masingita swa ku pfuxiwa ka Yesu Kreste, ku vitanela vanhu ehandle ka xidinominexini, ku nghena eka Vukona bya Yesu Kreste, ku hanya, ku ya eTikweni. Ku hava xihoxo, vanghana. A hi leswi ndzi nga eku swi vuleni; ntsena ndzo va makwenu wa n’wina. Kambe, hi leswi Xikwembu xi nga eku swi khorwiseni eka n’wina, leswi swi swi endlaka Ntiyiso. Langavi ra Ndzilo leri fanaka leri Xi nga ri tirhisa eka letin’wana timbirhi, Xi Ri tisile exikarhi ka n’wina namuntlha, nakona xi Ri khorwisile hi xisayense. Tani hilaha mi swi tivaka, *Life* magazine yi Ri pakile n’hweti leyi nga hundza, kwalahaya. Laha . . .

²⁶⁷ I vangani lava a vari kona na ku ndzi twa ndzi vula hi mayelana na sweswo, leswi swi nga humelela, loko swi nga se swi endla? Ndzi ehléketa, hi munhu un'wana na un'wana ekerekenei.

²⁶⁸ Hi sweswo. A va swi tivi leswaku swi hi mayelana na yini; vativi va sayense va le ku swi ringeten. Mani na mani loyi a nga kuma xifaniso xa Rona, u foyinile, "Papa, makume mbirhi-ntsevu wa timayili ku ya ehenhla, hi xivumbeko xa phiramidi." Tintsumi ta nkombo ta yimela lahaya, ti tlheriserile endzhaku na ku mi tisela Rito ra Xikwembu, ehansi ka huhutelo. Ri mi byela hi tiawara leti mi nga eku teni na ku hanya eka ton. Miehleketo ya ximoya yi ta swi tlakula sweswo kona sweswi, ma vona, na ku swi kuma. I eksoda. Hi ya eku fambeni, rin'wana ra masiku lawa. Ku khensa a kuve ka Xikwembu. Tsundzukani.

Nakona ndzi ta pfala, ntsena xinkadyana. Ndzi na khume ra timinetse.

²⁶⁹ Xiyisisani Langavi ra Ndzilo leri ri nga va vitanelia ehandle, ri va rhangela kuya etikweni leri nga tshembhisiwa, ehansi ka ntoto wa muprefeta. Langavi ra Ndzilo leri a va kota ku ri langutisa, ri va rhangerile ku ya etikweni leri ri nga tshembhisiwa, ehansi ka muprefeta loyi a nga totiwa. Nakona nkarhi na nkarhi a va n'wi yisa ehansi. Hi swona sweswo? [Nhlengeletano yi ku, "Amen."—Muhleri.] Hakunene-nene.

²⁷⁰ Sweswi, ndza swi tiva leswaku hi fanele kuva na ntirho wa ku khuvula. Ndzi na kwalomu ka mapapila manharhu mo engeteleta lahwani, ndza tshembha. Kambe ndzi ya eku yimeni sweswi, ntsena xinkadyana.

²⁷¹ Swi langutiseni. Hi le ka ku vitaneriwa ehandle. "Humani eka Babilona, vanhu va Mina," ku vula rito ra ntsumi." Ehandle ka yini? Mpfilumpfilu. Xana Methodist yi lulamile, kumbe Baptist, kumbe Khatholiki? "Humani eka yona." Xikwembu xi lulamile. Xana mi swi tivisa ku yini? "Rito ra munhu un'wana na un'wana a ri ve vunwa, kutani ra Mina ri va Ntiyiso. Humani eka yona." Xana mi tiva yini? Langavi ra Ndzilo leri ri fanaka, Moya lowu fanaka wa ntoto, lowu rhangelaka ku ya eTikweni leri ri nga tshembhisiwa.

²⁷² Xiyisisani, ri va rhangerile, ri va humesela ehandle, ri va rhangela ku ya etikweni leri ri nga tshembhisiwa; Israel, tiko.

²⁷³ Nakona Xikwembu lexi fanaka, Langavi ra Ndzilo leri ri fanaka! Sweswo ntsena... "Va vula leswaku e...leswaku khamera liya..." Loko mi hlaya George J. Lacy; ku ngari mina, sweswi. Mi hlaya laha George J. Lacy a nga kambela xifaniso xexo. Nhloko ya F.B.I., ya vukandziyisi bya tintiho na tidokhumente, ku na xitatimente xa yena. "Un'wana u ri, 'lense ley i nga paluxiwa hi kambirhi.'" Makume ya magidi ya vanhu va Ri langutisile, hi matihlo ya vona vinyi. Hi yimile lahwani kutani hi Ri langutisa. Mi Ri langutisile. [Nhlengeletano yi ku, "Amen."—Muhleri.] A hi rona. "Va te, 'A kuri vuxisi bya swa

matihlo.” Xana Nkul. Lacy u te yini? “Tihlo ra vukhanikhi bya khamera leyi a byi nge teki ntivo-miehleketo.” Ahaa. A ku ngari vuxisi bya swa matihlo. Ri kwalahaya, Langavi ra Ndziro leri fanaka.

Kutani va ri, “Oho, kunene, sweswo a kuri vuxisi.”

Sweswi, tikhamera, hinkwato, eka kwalomu ka madzana ya timayile ta le Tucson!

²⁷⁴ Ntsevu wa tin’hweti loko swi nga se humelela, hi mi byerile, hi Moya lowo Kwetsima, ndzi tava ndzi ya kwalahaya ku ya kuma mahungu. Hikuva, ku Tsala ka phiramidi ku le handle, tani hilaha makwerhu a ngava na norho, nakona ndzi wu hlamuserile eka n’wina. Yaley i nhlamuselo hinkwayo ka yona. Sweswi, hinkwaswo swihundla swa ku lulamisiwa, ku basisiwa, nkhuvulo wa Moya lowo Kwetsima, a swi hetile ku hlamusetiwa. Sweswi ku rhwalela makumu ntshuxeko wa sweswo, leswi a swi lemeriwile eka Swilemo swa Nkombo, ku ngari tikereke ta nkombo. Swilemo swa Nkombo swi paluxa swihundla. Kutani Xi pfurile nchumu lowu, hi le henbla, na ku kuma Ribye kwalahaya, ro basa, kambe a ku nga se tshama ku tsaleriwa eka rona. A kuri xihundla.

²⁷⁵ Famba eTucson; swi vhumbhe swi nga se humelela. Yima en’walungu wa Tucson, timbhoni ti yimile lahawani na swona, loko ku buluku ku ta, loku ku nga ninginisa tintshava ku suka ehansi, ha kanyingi. Hi nkarhi wun’we, xirhendzeyutani xa Rivoni a xi lengalenga kwalahaya emoyeni, loko sayense yi ta teka swifaniso sweswi. “Makume mbirhi-ntsevu wa timayili ku ya ehenbla,” ku ringana ka ntlhanu hi mpfhuka wa hunguva kumbe leswi xin’wana na xin’wana xi nga vaka swona. Nakona va ngaka va nga xi kumi lexi xi nga swi endla.

²⁷⁶ “Ku tava na ku Vonakala hi nkarhi wa ni madyambu.” Ndlela yo ya eVukwetsimelweni kunene u ta yi kuma, loko u ri muhlawuriwa. Mbewu liya yi welaka emisaveni yo oma, ehenbla ka maribye, yi ngaka yi nga endli nchumu; to nonoha, timbilu ta maribye leti ti lavaka ku honisa. Kambe loko hinkwato To wela ehenbla ka leyo olova, misava yo nona ya ripfumelo, Ti nga humelerisa Mukreste, loyi a tswalaka mihandzu ya Moya.

²⁷⁷ Xiyisisani hilaha Xikwembu xi nga endla sweswo. Sweswi Xi na Langavi ra Ndziro leri fanaka. Sweswo swi tiyisisiwile.

Munhu un’wana u te, “Hikokwalaho ka yini u nga yi u ya byela vativi va sayense hi mayelana na Sweswo?”

²⁷⁸ Mi ehleketa leswaku a va ta Swi pfumela? “U nga cukumeti maribye ya wena ya nkoka emahlweni ka tinguluve.” Yesu u vurile leswaku swi nga endliwi. A ndzi na ku rhangeriwa ku swi endla, hambi leswi ndzi hanyaka kwalahaya dorobeni laha a va ri karhi va swi vitana. A ndzi ehleketa leswaku ndzi ta rhelela kona. Moya lowo Kwetsima wu te, “Tshamela ekule. A hi swa vona. Tlhelela endzhaku u ya byela tabernakele.” Swi lulamile.

²⁷⁹ “Nakona swi ta humelela. Loko leswi va swi vulaka swi humelela, kutani, tsundzukani, Ndzi vulavurile,” Hosi yi ri, “vonani, loko swi nga se humelela.” Hi leswiya swi humelelaka. Yingisani Bibebe, Rito ra Xikwembu leri ri vitanaka eka n’wina eka siku leri.

²⁸⁰ Sweswi ndzi lava leswaku mi xiyisisa. Langavi ra Ndzilo leri ri fanaka ri le ku rhangeleni ka vanhu nakambe ku ya eTikweni leri ri nga tshembhisawa, Mileniyamu. Laha, hi nga kuma, ehansi ka huhutelo wa Xilemo xa Vuntsevu, a xi se tshama xi dyondzisiwa, hilaha misava yi faneleke ku tengisiwa hikokwalaho ka Mileniyamu. Langavi ra Ndzilo ri le ku va rhangeleni ku ya eka Mileniyamu.

²⁸¹ Nakona xiyisisani Langavi ra Ndzilo leri ri nga rhangela Israel ku suka evuhlongeni, eka eksoda liya; Langavi ra Ndzilo, ehansi ka vurhangeri bya Xikwembu...Xikwembu a xi ri Ndzilo, nakona Langavi ra Ndzilo ri totile ntsena muprefeta. Langavi ra Ndzilo a ri ri ro yima tani hi mbhoni ya le Tilwени leswaku Muxe a vitaniwile.

²⁸² Tsundzukani Datan, vona, va ku, “Kunene, hi fanele ku sungula vandla. Muxe, u tikokela swo tala ehenhla ka wena. U ringeta ku vula leswaku hi wena ntsena u kwetsimaka exikarhi ka hina. Nhlengeletano hinkwayo ya Hosi ya kwetsima. Xana u nga tikokela njhani leswi eka wena?”

²⁸³ Nakona Muxe u wile hi mombo wa yena kutani a sungula ku rila. Xikwembu xi ku, “Tihambanyisi na yena. Ntsena ndzi ta pfula misava kutani yi n’wi mitela ekule.” Xifananiso. Xana swi nga... Muxe u va byerile leswaku a ri karhi a va byela leswi Xikwembu a xi swi vula, Xikwembu xi ri karhi xi Swi tiyisisa kuva swi ri Ntiyiso.

²⁸⁴ Hambi a ri Miriam, muprefeta wa xisati hi yexe, na Aroni, va hlekurile Muxe, hikuva a tekile nhwenyana luya wa Muethiopia, va ri karhi va n’wi hlekula. Kutani Xikwembu xi hlundzukile; hi ku vulavula ku lwisana na nandza wa Xona. Xana xi endlile yini? Xi va vitanerile ehandle enyangweni wa tabernakele. Nakona Miriam, hambi swi ri tano, a ri muprefeta wa xisati. Kambe Muxe a tlula muprefeta, a tlula muprefeta. Xi te, “Xana a mi xi chavi Xikwembu? Loko kuri na muprefeta exikarhi ka n’wina, Mina Hosi ndzi ta vulavula na yena hi swivono, na ku titivisa Mina n’winyi eka yena hi milorho, kambe,” xi ku, “ku ngari Muxe.” Xi ku, “Xana a mi xi chavi Xikwembu?” Nakona wansati—wansati a ri hafu ku fa hi nhlokonho, hi xinkadyana xexo. Ma swi tiva sweswo.

²⁸⁵ Xana A nga vulanga leswaku, “Yohana Mukhuvuri. Xana a mi yile ku ya vona muprefeta? Ina, loyi a tlulaka muprefeta”? Hikokwalaho ka yini? Hikokwalaho ka yini a vile loyi a tlulaka muprefeta? A ri murhumiwa wa Ntwanano, areka leyi yi hlhanganiseke ku averiwa lokuya ku mbirhi swin’we.

²⁸⁶ Nakona namuntlha, e...leswi hi nga na swona exikarhi ka hina, Moya lowo Kwetsima lowu kulukumba, wu tlula muprofeta. I Xikwembu lexi xi vonakarisiweke exikarhi ka hina, hi Rito ra Xona ku swi khorwisa. Wu endla ku tlula muprofeta, ka gidi ku tlula hilaha vaprofeta va endlaka hakona.

²⁸⁷ Eliya, un'wana wa vaprofeta lava kulukumba va nguva, u endlile ntsena mune wa swilo leswi swi nga ehenhla ka ntumbuluko, eka hinkwabyo vutomi bya yena bya makume nhungu na man'wana malembe. Nakona Elixa, na matimba ha kambirhi, u endlile nhungu.

²⁸⁸ Nakona hi vona magidi ku andzisa hi magidi, hi matihlo ma hina vinyi, langutisani Ntsumi ya Hosi, hi Langavi ra Ndzilo. Vulavisisi bya Xisayense, byi swi yisa emisaveni, va ri karhi va swi tiva leswaku va ta avanyisiwa hi Swona. Xana Xinyimpfana lexiya xi endlile yini, Ntsumi liya ya Hosi, leyi a yi ri Kreste? Ma swi pfumela xana? [Nhlengeletano yi ku, "Amen."—Muhler.]

²⁸⁹ Mukwetsimi Yohana 6. Hinkwavo a va ri eku nweni ka mati lawa, na kuva na nkarhi lowukulu na ku tsaka. U te, "Hi mina Xinkwa xa Vutomi lexi xi humaka eka Xikwembu ku suka eTilweni. Hi mina Ribye leriya rale mananga."

²⁹⁰ Va te, "Sweswi ha swi tiva leswaku Wa penga. Wa—Wa penga. U, U na javulosi endzeni ka Wena. U Wanuna wo penga, hi javulosi." Ma swi tiva, vanhu va kuma moya eka vona, nkarhi wun'wana va va na nkhinkhi swinene, va vukhongeri. Va te, "U—U javulosi. U na javulosi endzeni ka Wena. U Musamariya, nakona U na javulosi eka Wena." Va ku, "Hi leswi, a Wu seva na ku tlula makume ntlhanu wa malembe hi vukhale, nakona U ri 'u vonile Abraham'?"

²⁹¹ Ingaku ndza N'wi vona a tlhelela endzhaku hi magoza mantsongo. A ku, "NDZI YENA LOYI NDZI NGA YENA. Loko Abraham a nga seva kona, NDZI YENA." Wolowo a wu ri Ndzilo lowu pfurhaka, Langavi leriya ra Ndzilo exihlahleni.

²⁹² Loko A file, na ku pfuka hi siku ra vunharhu, kutani Saul a hlangana na Yena endleleni yo rhelela, A tlhelerile eka Langavi leriya ra Ndzilo. U te, "Ndzi huma eka Xikwembu, nakona Ndzi ya eka Xikwembu."

²⁹³ Loko Petro a ri ekhotsweni, Langavi leriya ra Ndzilo ri nghenile endzeni, ri pfula mavanti na ku n'wi humesela ehandle. Hi swona sweswo.

Xana Langavi leriya ra Ndzilo ri va rhangerile kuya kwihi?

²⁹⁴ Sweswi, tsundzukani, Muxe a ngari Langavi ra Ndzilo. A ri murhangeri loyi a totiweke, ehansi ka Langavi leriya ra Ndzilo, nakona Langavi ra Ndzilo a ri tiyisisa ntsena Hungu ra yena hi swikombiso na masingita.

²⁹⁵ Nakona Langavi leriya ra Ndzilo ri va rhangerile ku ya etikweni leri Xikwembu xi nga va tshembhisa rona, laha Xona,

hi Xoxe, a xi ta endliliwa nyama exikarhi ka vona, siku rin'wana. Hi swona sweswo? [Nhlengeletano yi ku, "Amen."—Muhleri.] Xana va endlile yini? Va n'unun'utile na ku tshukunyuka, na leswin'wana hinkwaswo, ku kombisa leswaku a swi ri ehansi ka ngati ya xinyimpfana xa ntolovel.

²⁹⁶ Kambe nkarhi lowu (ku kwetsima i ka Xikwembu), Langavi leri hi ri vonaka exikarhi ka hina, Langavi ra Ndzilo ri ta hi rhangela ku ya eka Mileniyamu, laha A nga ta hundzulukela eka vanhu va Yena eka ku fuma lokukulu ka Mileniyamu endzhaku ka eksoda, laha hi nga ta hanya hilaha ku nga Heriki na Yena. U tshama a ri na Rito ra Tatana, u tshama a ri karhi a khorwisa leswaku Ri lulamile.

²⁹⁷ Hi le ka eksoda. Nakona hi le ku fambeni, na ku tima tithepi xinkadyana. Oho, vanghana va mina, vamakwerhu va mina, ha vumbirhi lava va nga kona na lava va nga ta twa tithepi, mi nge ndzi...tani hi makwerhu wa n'wina na muakatiko wa Mfumo wa Xikwembu. Humani, eka eksoda leyi, hikuva hinkwavo lava va nga ta siyiwa endzhaku va ta rhwala mfungho wa xivandzana. Humani eka Babilona. Humani eka mpfilumpfilu lowu. Humani eka mafambiselo lawa, kutani mi tirhela Xikwembu lexi hanyaka. Pfumelelani...

²⁹⁸ Ntsumi leyi leyikulu ya Ntwanano! "Yesu Kreste, hi xivumbeko xa Xikwembu, a nga swi anakanyanga, ku tiyisa ku fana ka yena na Xikwembu" Sweswi hi Yena Langavi ra Ndzilo, hi xivumbeko xin'we lexi A ri eka xona endzhaku lahaya, a ri karhi a tisa eksoda liya yo rhanga, a ri karhi a tisa eksoda liya ya vumbirhi, nakona hi Loyi lahawani na eksoda ya vunharhu.

²⁹⁹ Eksoda yo rhanga, xana U endlile yini? U va humeserile ehandle ka tiko ra ntumbuluko, ku ya etikweni ra ntumbuluko.

³⁰⁰ Eksoda ya vumbirhi, U va humeserile ehandle eka xiyimo xa ximoya, ku nghena eka nkhuvulo wa ximoya wa Moya lowo Kwetsima.

³⁰¹ Sweswi U le ku va tiseni ku suka eka nkhuvulo wa ximoya wa Moya lowo Kwetsima, ku tlhelela endzhaku eTikweni ra hilaha ku nga Heriki ra Mileniyamu na ku suka laha kuya Emahlwени loku kulukumba. Langavi ra Ndzilo leri fanaka, hi mafambisele lama totiweke lama ma fanaka, Xikwembu lexi fanaka xi ri karhi xi endla swilo leswi fanaka! Na rona Rito leri fanaka, ri tiyisisile yo rhanga, ri tiyisia ya vumbirhi. Rito leri fanaka, ri tiyisisile ya vumbirhi, ri tiyisisile ya vunharhu, nakona hi leri lahawani hi Ri vonaka exikarhi ka hina.

³⁰² Humani. Oho! Humani eka mpfilumpfilu lowu. Tanani eka Xikwembu lexi hanyaka. Tanani eRitweni. "Kutani Rito ri endliliwile nyama kutani ri tshama exikarhi ka hina." Kutani sweswi Ri le nyameni ya hina, ri tshamile exikarhi ka hina. Humani mi ta tirhela Xikwembu lexi hanyaka.

³⁰³ Loko ha ha korhamisa tinhloko ta hina. [Makwerhu a vulavula hi ririm i rimbe. Makwerhu un'wana a nyika nhlamuselo—Muhleri.]

³⁰⁴ Na tinhloko ta n'wina leti korhamisiweke. Ku suka emakorhwani ya mimoya ya n'wina, ku suka emakorhwani ya hinkwaswo leswi swi nga endzeni ka n'wina, ma swi rhandza ku tsundzuka ku... Mi tilulamiserile ku yimisa swilo hinkwaswo swa misava, kutani mi hanyela Xikwembu-ke? Sweswi, loko mi nga vuli swona leswi, mi nga swi endli. Kambe loko mi vula swona, hi timbilu ta n'wina hinkwato, leswaku sweswi mi khorwile. Tani hilaha Yesu a nga vula hakona, emakumu ka ministri wa Yena, "Sweswi xana ma pfumela?" Xana mi khorwile leswaku swilo leswi swi lulamile, swi tiyisisiwile hi Xikwembu, na leswaku hi le makumu ka nkarhi, nakona hi ntuyiso mi lava ku ta eka Kreste sweswi? Tanani eka eksoda leyi, ya ku vitanelia ehandle ka vuhonisi, xidinominexini, mianakanyo na swilo swa misava. Nakona mi lava ku tinyiketa hi timbilu leti heleleke eka Yena na ku humela ehandle eka eksoda, hikokwalaho ka Tiko leri tshembhisowiweke leri nga kateka, mi nga yimisa mavoko ma n'wina loko ha ha khongela-ke? Xana ma tiyisisa leswaku mi lava ku humela ehandle, hinkwenu?

³⁰⁵ Tatana wa le Matilweni, lava va tlakuseleke mavoko ma vona ehenhla, va pfumelele va humela ehandle sweswi, Hosi. Pfumelela Moya lowo Kwetsima, ehenhla ka xitshembhiso xa Rito, pfumelela Moya lowo Kwetsima wu nghena etimbilwini ta vona. Eka nhlengeletano ya hina, a kuri na kwalomu ka makume mbirhi wa mavoko, ndza tshembha, Tatana, lava va nga enetiseka na ku tiva leswaku swi—leswaku swi ntuyiso, nakona va lava ku humela ehandle. Loko a kuri na...

³⁰⁶ Hi masiku ya ku huma ka Israel, eka mbirhi na hafu ya timiliyon i vanhu, i vambirhi ntsena lava va nga fika etikweni.

³⁰⁷ Hi masiku ya Yesu Kreste, a kuri na kwalomu ka dzana na makume mbirhi lava va nga swi kota.

³⁰⁸ Kutani sweswi, hi masiku ya ku hela ka misava, U te, "Nyangwa wa kona wu khumile, na ndlela ya kona yi larile, kambe lava va nga ta yi kuma i vantsongo. Kambe ndlela leyi yisaka eku loveni yi anamile, nakona lavo tala va ta nghena kona." Marito lama ma ngaka ma nga tsandzeki. I ma Wena.

³⁰⁹ Sweswi ndza va khongelela, Hosi. Ndza khongela leswaku U ta swi endla, eka awara leyi, hi Moya wa Wena lowo Kwetsima, ku yimbisa timbilu ta vona. Humesa swilo hinkwaswo swa misava. Yimbisa tindleve ta vona, hikuva va nga twa erivaleni Rito ra Xikwembu, ri ri karhi ri huwelela, hi Rito ra Xona na hi Rivoni ra siku. Nakona hi nyike, Hosi, leswaku matihlo ma vona ma ta pfuleka, leswaku va ta vona ku kwetsima ka Wena eka awara leyi ya ku hetelela yo pfala. U te, "Hinkwavo lava Tatana

a nga Ndzi nyika vona va ta ta, nakona Ndzi ta va pfuxa hi siku ro heteleta.”

³¹⁰ Hosi, kumbexani ku na votala lahawani lava va nga se twisisaka. Ndza khongela leswaku U ta tirhana na vona, nakona u ta va pfumelela kuva na nkateko wun’wana, Hosi, leswaku va ta kota ku twisia, ku twa Wena u ri karhi u vulavula hi Rito ra Wena, ku tikhoriwisa hi Wexe; kutani u vulavula na hina hi rito leri nga ehenhla ka ntumbuluko, kutani hi nhlamuselo; ku vona mintirho ya Wena leyikulu yi ri karhi yi khorwisa leswaku Ri ntiyiso, hi ku ya hi Bibebe. Ndza khongela, Xikwembu, leswaku U ta hi rivalela eka swidyo ho swa hina, sweswi, na loko ndza ha titlhandleka ehenhla ka Rito leri.

³¹¹ Xikwembu, ndzi le ku ehleketeni ka leswaku, ntsena vhiki leri nga hundza, ndzi—ndzi titlhandlekile ku tsemakanya wanuna loyi a fele ehansi lahawani. Ndzi vonile Moya lowo Kwetsima lowu kulukumba wu n’wi vuyisela evuton’wini. Mahlo ma yena a ma tlhelerile endzhaku exikosini xa nhloko ya yena, a pavalarile, a file. Ntsena lamantsongo, marito ma ngari mangani ma ku vitana Vito ra Wena, ndzi n’wi vonile a hanya. Hi loyi lahawani namutlha, wa hanya, hambiswiritano. Hosi, Wa hari Xikwembu lexi fanaka, lexi, loko Paul a titlhandlekile ku tsemakanya jaha leriya, a ri n’wi yingiserile loko a ri karhi a chumayela nkarhi wo leha swonghasi, wanuna luya a nga wa ku suka efasitereni. Wa hari Xikwembu lexi fanaka lexi xi nga tlheriselaka vutomi. Ha Ku khensa, Tatana. Ingaku... Loyer a nga pfumeriki a ngava a nga pfumeli. Kambe ha pfumela, Hosi. Wena u tikhoriwisile hi Wexe eka hina.

³¹² Sweswi pfumelela ku ehleketa ka mbilu ya mina, na mianakanyo ya miehleketo ya mina, ntamu wa mina na hinkwaswo, swi n’okiseriwa endzeni ka Rito leri. Nakona pfumelela Rito na mina, kun’we, Hosi, na vanhu, hi macha ku kongoma Mfumo wa Xikwembu. Hi nyike swona, Hosi. Hi rivalele swidyo ho swa hina. Horisa vuvabyi bya hina, na ku hi endla malandza ma Mfumo wa Wena.

³¹³ Kutani sweswi, tani hi loko lava va ri eku teni, Hosi, nakona xidziva xi le ku pfuriweni, mati ma lunghekile, nakona nkhuvulo wu tava wu ri karhi wu sungula eka timinetse tintsongo, hi tsundzuka loko Evhangeli leyi fanaka yi chumayeriwile, Bibebe yi te, “Lavotala lava va pfumeleke va khuvuriwile.”

³¹⁴ Hi leswi swidukwana swi nga tlhandlekiwa lahawani, Hosi, leswi ndzi swi katekisaka hi Vito ra Yesu Kreste, hikokwalaho ka ku horisiwa ka vavabyi. Kutani loko...

³¹⁵ Swikhongelo swa hina swi lehile, swi hungutiwa, hikuva tiawara ti hundzeriwile. Hi fanele ku veka Rito loko ka ha ri na misava yo Ri veka kona, hikuva xixika xo titimela xi le ku teni. Ha xi vona. Matluka ma le ku weni, nakona ha swi tiva leswaku xixika xi kwala kusuhi. Hi fanele ku handza ehenhla

kutani hi lahla Mbewu. Swingaleswi, ndza khongela, Tatana wa le Matilweni, leswaku U ta vulavula na mbilu yin'wana na yin'wana.

³¹⁶ Nakona Bibele yi te, “Lavo tala lava va pfumeleke va khuvuriwile.” Kutani, Hosi, loko ku ri na votala lahawani lava va nga pfumela, nakona va nga se tshama va khuvuriwa hi Vito ra N'wana wa Wena loyi a rhandzekaka, Yesu, ingaku va nga ta emixwени lowu, hi ku tsokombela na ku titsongahata, na ku tivula vudyoho bya vona, na ku fa eka swilo swa misava; ku lahliwa, ku teka Vito ra Yesu Kreste; ku hanya hi vukwembu, ku sukela sweswi ku ya emahlweni, hi ku pfuniwa hi Moya lowo Kwetsima. Hi va nyiketa eka Wena sweswi, Hosi, hikokwalaho ka xikongomelo lexi, hi Vito ra Yesu Kreste. Amen.

³¹⁷ Sweswi hi tlherisela ntirho eka Makwerhu Neville, na swin'wana na swin'wana leswi a nga na swona swo swi vula, loko ha ha tilulamisela ntirho wa ku khuvula.

³¹⁸ Kutani vusiku lebyi, hi hafu ku bile awara ya nkombo, loko Hosi yi swi rhandza, ndzi lava ku kandziyisa Hungu leri rin'wana. Xikwembu xi mi katekisa ku fika nkarhi wolowo. 

EKSODA YA VUNHARHU TSO63-0630M
(The Third Exodus)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto ni mixo, Khotavuxika 30, 1963, eTabernakeleni ya Branham eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2018 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org